

JESUCRISTO NIQUITISHANO JUAN

Jesucristo niquitishano pajaniyara

1 ¹Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishitiniuria na tojitiajaca, taa quiari naataja Pueyaso miiniutianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. ²Janiyari puetunu na niquitishanojuanaa caminiujiya nijaniya seetanujuaanaani. Niocuajaari seetanujuaanaa Pueyaso rupaa, Jesucristojiniji cua caminiujiushano niaara.

³Shuquiriaatia quijiaca cutaraari noo pojori, canapueete nio cua caminiujiushano Pueyasojinijini serojonutaniya Pueyaso pueya maapue niquiarani. Na tojitiajacaari shuquiriaatia quijiaca quiniutianiyajuhuj, nojori tiuuniucua nio naajiojinia cua pohuatasanoocua. Nio pohuatasano tohuateenuraari tari catecanoya.

Juan naajiosano siete Pueyaso pueya maapueecura

⁴Janiyari Juanni. Asia jiyajinia quiniaa siete Pueyaso pueya maapueecura naajianijia. Pueyaso cuaara cumaquiiria nijaniya, cuaara nioojia cajitiirajuhuj. Pocua niriquiano pa Que Pueyasoori jiyanojua maninia. Nojuajaari pueyaraanu quijiacuaja. Quiarijia quijajaariuhuj. Na Sohuanuuri juhua

siete saminio casaa niquishano, puetunu tiquiyocuajanaa quijia na quiniuucua. Nojoriiri Pueyaso cajishaqui taccoji quitiuya. ⁵Pueyaso Niyanu Jesucristoori seetanujuaanaa puera caminiujiunia puetunu na Que Pueyaso Rupajanaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyaniijia-nucujanaa Jiyaniijia. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucuajanaa sesa miyashijiacara na jataniniuria pajaniya. ⁶Nojuajaari pa jiyatequiaari jiyaniijianucua pa quiniuria, na Que Pueyaso secojonaa pa quiniuria pueyacuara, nojuaja pa shuquiritianurajuhuj. iPa Jiyaniijiaari jiyanojua maninia! iPa Jiyaniijia cuaara shuquiritiasaaria pueyaracaanu! iNojuacuajaari puetunu cumaacaracajanaa pueyaracaanura! Cuaara naa quiriiritej.

⁷iNia maure! iPa Jiyaniijia Cristoori cohuajajinia tari cunocojiuhua! Puetunu pueyajaanaari na niquiniutianiya, noo pojorijiuuhuj, na motenaatej. Puetunu mijiria quijiaca pueyapuejanaari nocuaji nujuquenutaniya nojori martenuta. Taaquiriirinj. Naa quiniutianiyacuaaquiniateja na tiquishacariuhua.

⁸Pa Jiyaniijia Pueyasoori tama nojuajinijiaaja sequeya:

“Janiyacujaari puetunu casaajanaa coteetanani, na shaajariquianojuhuaj.

Puetunu cumaacaracajanaanijia.
Janiyacuaajaari pueyaracaanu quijiani.
Majaari cua supueni quiquiaari. Janiyari
niaacua tiuquiriquianohuani”.

**Juan niquishacari Cristo puereeta na
shacantuuca cumaacajinia quiyano**

⁹Janiyari niarta Pueyaso pueyano
Juanni. Pa Jiyaniijia Jesuucua tiuujia cua
quiniuucuaajuhua, janiyari jaarajaaja
niaata cojiritiashiya naquiya miiniuni.
Naaratej, paari mariyata jiyaniijianucua-
ra jiyatesocoriquianoni. Cunora, paari
juhuajaniya naquiya miiniu rejereta-
quiaani Jesucristo cumaquishacari
pajaniya. Pueyaso rupaa Jesucristojiniji
cua poojotanuucua, janiyari shoniniacu
caminia jiuujiajinia jatasano quiyani jiya
tucuaatiajaacua. Nio jiya tucuaatiaja
sesaari Patmos. ¹⁰Tamonu juuca, pa
Jiyaniijia samiitianuhua pa niishiniu
juucani, Pueyaso Sohuanuuri cucua
niqianu jiyanhua na cumaacata.

Janiyari jiyacari rupaa tojirii nacaano
cua nijiniarani, juhua trompeta jonenenu.

¹¹Cua sequeriquiaari:

—Casa cua niquitiniutianiya quiajani-
yani, cuno quia naajiotare
nequesoreetuneerano. Quiocua na
nuhuaji na jiyarore Asia jiyajinia nio siete
cua saquiriojosano pueya maapueecua.
Nojoriiri Éfeso tiacajinia quiniaa,
Esmirna tiacajinia, Pérgamo tiacajinia,
Tiyatira tiacajinia, Sardis tiacajinia,
Filadelfia tiacajinia, Laodicea tiacajinia-
nio.

¹²Janiyari cua nijiniara tacatequeeni
cua niquiniuria cante cucua pocuari-
quiaani. Cua tacatesacari, janiyari siete
samari nujuatacojua niquiriini, orojiniji
shipinijosano. ¹³Cuno samari nujuataco-
jua tajiniani, janiyari pueyano niquiriini,
juhua Pueyaso Niyanu niquishano.
Tucuaque toque cushiriquiaari. Na
niohuacaacuma puecariquiaari. Na

jiriquiajinia camarucuteriquiaa orojiniji
shipinishano casaari. ¹⁴Pueyaracaanu
quijia na quiniuucua, na muecacaari
tojetaarucujanaa jiyanhua cohuaja
quiriquiaa juhua sohuanatu. Maatia
pueya jiuujia niquijia na quiniuucua, na
namijiaari juhua mani rimianacuriquiaa.

¹⁵Na niohuacaari nenecuariquiaa juhua
jiyanohua naseeca casaajinia mohuaqui-
shano bronce. Naa shacantuuca
niquishano quiriquiaari puetunu sesa
casaajanaa paracaajia na quiniuucua.
Cumaacaraca Jiyaniijia na quiniuucua,
na pocuasacari, jiyanhua tojishaari-
quiaari juhua sararojua, jiyocuacaanuji
mohuaca tijia. ¹⁶Na miaquetajata siete
riya muetujuriquiaari. Naajuhua,
nijiniaquetucua mueruuri na rupaamaji
mueranacuriquiaa, na rupaa ruaretajaca
na puecoonura. Na jiquiocoori jiyanhua
shacantuuca quiriquiaa juhua jiyanhua
pananu jasacari panacari.

¹⁷Cua niquishacari nojuaja, janiyari cua
puerenuta na pajama pojiyaree juhua
macuni. Nojuajaari saaja na miaquetaja
niaree cucua. Cua sequereeri:

—Maja puereenu. Janiyacuaja Jesuni.
Janiyari puetunu casaajanaa coteetjani,
na shaajariquianojuhuaj. ¹⁸Janiyari
pueyaracaanu quijiani. Macu quiquiaari-
nijia. Naajaa, janiyari
samiitiaquiaariuhuani pueyaracaanu
saminio cua quiniuria. Janiyari macunu-
cua quiquio riatataja camaruni.
Naacuaajitij, janiyari cumaacaracani cua
tojiyashijiaca cua quejoonura macunucua
quiquiojinia. ¹⁹Pueya niishishocoriquia-
no, quia niquishano quia naajiotare
Juannaa, taa na quiyacuajani, naajuhua
taa mijiria quijia miishaanutaniya na
nuhuajini. ²⁰Quiarijia quia pohuatareera
maatia quia niishiniuria cua niquitishano
quiajaniya. Cuno siete riya quia niquisha-
no cua miaquetajata cua muetujusanoni,
cunoori siete cua seya. Nojoriiri siete cua

saquiriojosano pueya maapue jiitianaa. Cuno siete samari nujuatacojua orojiniji shipinijosano quia niquishanojanihuaj, cunoori siete cua saquiriojosano pueya maapue.

Éfeso tiacajinia quiniaa Pueyaso pueya maanuucuaa naajione

2¹Juhucatecara naa cua sequereeri: —Éfeso tiacajinia quijia cua seruucuaa quia naajiore, Pueyaso pueya maanu jiitianani. Naa quia sequere nojuaja: “Nojuaja, cante siete riya cacaa na miaquetajatacuajani, cante siete samaritiu nujuatacojua tajinia rucuanajojuacuajani, nojuajaari naa quia sequeya: ²Janiyari puetunu quia miishanojuanaa niishiyani. Quiaari jiyanhuaa poonijioquiaa quiria. Naajuhuaj, quiaari puetunu casaajanaa rejeretaquiaa juhuajaniya. Janiyari niishiyajuhuaj, majaari quia shanacunu quiquiaa sesa mijiaca nia tajinia. Naajuhuaj, quiaari cuno sapojonuujuaa nequesoreecanu, noo pojori canapuee tama sequeriquiaajaajani: “Canaari Jesu jiyaramiquishanoni”. Naa quia nequesoreesacari nojoritij, quiaari niishiquianu nojoriiri sapojonuujuaa seetanujuaanaa. ³Quiaari puetunujuanaa taraatia quia miiniu rejeretaquiaa, cucua tiuujia quia quiniuucua. Quiaari pueyaracaanu quiria poonijiojua maninia. Quia samareesacari, naajaa, majaari quia tarinitianu quiquiaa. ⁴Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. ⁵Cunora, quia niishiri taa jiyanhuaa cua panijia quia quiquiaarini. Quioojia quia tacatorohua cucua, maninia mijia quia quiniuhuaa, taa quia quiquiaari coteenucuajani. Quiaa jaara quioojia tacatoyaquiri, janiyari quiocua niniutiani-

yani, Éfeso tiacajiniji cua patanura quia samaritiu nujuataja. ⁶Quiaari maninijuhuaj, sacuaraatia casaa Nicolás* niishitiojosano tojjijiaa miishano soojea quia quiniuucua. Janiyari cuno pojori miishano soyajuhuaj. Nio cua sequesano quiajanianani, cunoori puetunu cua pueyarajanaa. ⁷Cante numaacani, nojori cuaara tojiiria Pueyaso Sohuanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumaatiani, janiyari nojori jiyatenutaniya cuno naanajiniji mioojuarani, pueyaracaanu rishijiaa nojori quiniuria’”.

Esmirna tiacajinia quiniaa Pueyaso pueya maanuucuaa naajione

⁸Jianijia Jesucristoori naa cua sequereejuhuaj:

—Esmirna tiacajinia quijia cua seruucuaa quia naajiore, Pueyaso pueya maanu jiitianani. Naa quia sequere nojuaja: “Naa sequeyari cante puetunu casaajanaa coteetenacuajani, na tucuatajanio. Nojuacuajaari cusoquiaari, na nuhuaji samiitiaquiaariuhuari. Janiyacuajaari nojuajani. ⁹Janiyacuajaari niishiyani, quiaari naquiya miishaaquiaa. Quiaari casamirijuijuhuaj. Naajaa, quiaari jiyanhuaa casamiriacacuja niya cua shuriucuanu. Janiyari niishiyajuhuaj, cuno Judiocuacaari quia sesacaquiaa. Nojoriiri tama sequequiaajaacujua nojoriniaari Pueyaso pueya cutara, Judiocuaca nojori quiniuucua. Maja naatej. Nojori cutaraari Satanás* pueya maanu. Satanáscuajaari samaruhua jiyaniijia. ¹⁰Quiaari naquiya miishaanutaniya. Naajaa, majaari puerenu. Satanásri noojiaqueya niajanijajinijinio nujuatejotenutaniya nujuatejojuajinia nia sanishaanura, niaate cucua tiuujiaa seetanujuaanaa. Naajaa, niaari saaja

rupaquijia miishaanutaniya naquiya. Quia rejeretariquia saaja. Cua tojjia quia quiriquia pueyaracaanu, quiaa cuara shaajeyarejaatijia. Quiaa jaara naa miiritij, janiyari quia jiyatenutaniya jiyanhua shuquiriaatia quijia quia quiniuria pueyaracaanuni. Nio cua sequesano quiajaniani, cunoori puetunu cua pueyarajanaa. ¹¹Cante numaaracani, nojori cuara tojiiria Pueyaso Sohuanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso saniitiosacari na ruuretajaca. Na ruureta-jaca cutaraari quejoosaanutaniya mani noshijia caminiajinia”’.

Pérgamo tiacajinia quiniaa Pueyaso pueya maanuucuaa naajionee

¹²Jiyaniijia Jesucristoori socua cua sequeere:

—Pérgamo tiacajinia quijia cua seruucua quia naajiorejuhuaj, Pueyaso pueya maanu jiitianani. Naa quia sequere nojuaja: “Nijinaquetucuaaja mueruu jiitianaari naa sequeya: ¹³Janiyari niishiyani, cunoori Satanás quiqiojuhuaj. Naajaa, quiaari cua tojjia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaquiaari janiyajiniji pohuatunu na tarinitiaquiniucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanhua maninia. ¹⁴Saniniuujia, maja cutaraari nio cua maniniucuanu: tamasaca niajanijinijinioori maja na tarinitianu paniniu sesa na miijionu. Nojoriiri supuetana Balaam* niishitiojosano tojjijaca quiyajaa. Balaamcuajaari Israel pueya paraca Balac* niishitiojoquiaari na

pueya cuara shiniujiuuria Israel pueya, jaarajaaja Israel pueya miiniuria sesa nojoritia. Naaratej, Balac pueyari Israel pueya mianuutequiaari noo shu, teyanote juaashiquiaata shipinijosano casaacuara puecoosano quiquiaaricujani juhua Pueyasooacara. Naa sacuaaraatia nojori queranacujusacari nojori paraatatej, Israel pueyari cuniquijia cuno taatujuri numuetucujuquiaarijuhuaj. ¹⁵Naajuhuj, majaari nio cua maniniucuanu: noojiaqueya niajanijajinijinioori maja na tarinitianu paniniu jiyanhua sacuaaraatia casaa Nicolás* niishitiojosano. ¹⁶Quiaari nareja niquiquiaa sacuaaraatia nojori miijionu. Cunora, quioojia quia tacatorohua cucua, janiya mariqui quiocua quiaareeri cuno sacuaaraatia miijiacua cua miaquejonura cua rupaamaji mueranacujua mueruuta. ¹⁷Cante numaaracani, nojori cuara tojiiria Pueyaso Sohuanu sequesano Pueyaso pueya maapuera. Cante tama na cuaqueya miiniu panishanojuaja rejeta-jani, janiyari na mianuutenutaniya jiyocuacaanu cua racatasano cua pueyara-no cua riuriotacajinijinini. Janiyari na niquitionutaniya cohuajajau saajiajuhuaj, teyanocua quiarinio sesa naajiotasano quiniutianiyacuajani. Majaari tamonu niishiniu quiniutianiya cuno sesa. Saaja na camaruuri na niishiniutianiya, cana cua niquitionutaniya cuno saajiacuajani”’.

Tiyatira tiacajinia quiniaa Pueyaso pueya maanuucuaa naajionee

¹⁸Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucua quia naajiore, Pueyaso pueya maanu jiitianani. Naa quia sequere nojuaja: “Pueyaso Niyanu, juhua mani rimianacuyano namijiaaracani, juhua bronce mohuaquishano shacantuuca niohuacaracajuhuj, nojuajaari naa quia sequeya: ¹⁹Janiyari puetunu quia

miishanojuanaa niishiyani. Janiyacuajaari niishiyani, quiaari Pueyaso panijia, pueya panijianio. Quiaacuajaari Pueyasocua tiuuja. Quiaari maninia poonijiona Pueyasora, pueya quia naacunura. Naajuhuaaj, quiaari juhuajaniya rejeta-quiaa quiaa jaara taraatia miishaariquia. Janiyari niishiyajuhuaaj, puetunujuanaa quia miishano quiria quiarijiani, cunoori socua queraatia coteenu quia miishanojiniji. ²⁰Saniniuujia, nio cutaraari cua maniniucuaquishano: cuno Jesabel* niaata quiyani, tama na cuaqueyajaaja sequequiaani, nojuajanaari Pueyaso sequesano caminiujunia pueyara. Quiaari juhuajaniya na shanacuquiaa saaja, sacuaraatia na niishitiojosanota na sapojonura cua pueya. Naa sacuaraatia na niishitiojosanotatej, cuno maajiiri cua pueya shiniujuquiaa juhuajaniya nojori numuetucujunura na camishoo maajipohua. Cua pueya shiniujuquiaaariuhuaaj nojori miaquencunura noo shu, teyanote juuashiquiacata shipinijosano taucuaa pueyasohuacua puecoosano quiquiaacuajani. ²¹Janiyacuaajaari tari cuno maaji sashiquianu juucuani, noojia na tacatonura cucua. Majaari na tarinitianu paniniu paanatu na quiniu. ²²Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhuaaj, na numuetucunuujuaca jaara noojia tacatoyaquri sesa nojori miiniujiniji, janiyari jiyanhua naquiya miiniutianiya nojorini. ²³Noo maajipohuajuhuaaj, paanaturirria quinioni, cuno paanatujuanaa niishitiojnuucua nojori juhua necojorini, janiyari puetunu nojorijianaa pueconutaniyani. Naacuajitij, puetunu Pueyaso pueya maapuejanaari niishiniutianiya, janiyari puetunu nojori jiuujajiniajanaa nojori niishiriojosano niishijiani, nojori panishanoocua nojori jiaatianunio. Naacuajitij, janiyari maninia mijiaca niajaniyajiniji-

nio maninia miiniutianiyani. Niajaniyajinijinio sesa mijiaca saniniuujia, nojoriiri saniitiosaanutaniyacujua. ²⁴Tiyatira tiacajinia quiniaa noojiaqueya niajaniyajinijinio saniniuujia, niaari sacuaraatia cuno maaji niishitiojosano ruuretaquiaa saaja. Naajuhuaaj, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia mijiaca jiyaniquishanoni “jiyajeneta casaa, Satanásjiniji niishishano”. Naa nia ruuretanuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarijia niajaniya. ²⁵Saaja tama nia cuaqueyajaaja nia cojuare jiyanhua, maja nia tarinitianura maninia nia miiniu taa nia miquiaacuajani. Naa nia miiriquia pueyaracaanu, janiya jaara niaacua tiuquiriohuajaatijia. ²⁶Cante cua panishano miquiaa pueyaracaanuni cuaara shaajeyarejaatijia, janiyari cuno pueyapue jiyaniija na quiniuriani, taa cua Que jiyatequiaari janiya jiyaniija cua quiniuriacaani. ²⁷Jiyaniijanucuaa cua jiyatesano pueyani, nojoriiri cumaacaraca quiniutianiya na jiitasano pueya na tojitiniuria nojuaja. Na tojtiaashijiaa na saniitiosacari saniniuujia, nojori piyonutaniya jacanauraari, juhua cumamacata pishano conatu. ²⁸Naajuhuaaj, janiyari joojea na niqitionutaniyani, juhuaqueta-ja rijiani, shacantuca quijia na quiniuria juhua janiyajuhuaaj. ²⁹Cante numaaracani, nojuaja cuaara tojiiria Pueyaso Sohanu sequesano puetunu Pueyaso pueya maapuerajanaa’”.

Sardis tiacajinia quiniaa Pueyaso pueya maanuucuaa naajione

3 ¹Jiyaniija Jesucristoori socua cua sequere:

—Sardis tiacajinia quijia cua seruucua-
ra quia naajiorejuhuaaj, Pueyaso pueya

maanu jiitianani. Naa quia sequere nojuaja: “Naa sequeyari cante Pueyaso Sohuanu jiyaramiquiquiaa cuno siete Pueyaso pueya maapueecuacuajani, nojori jiuujiajinia na poonijionura. Nojuacuajaari cuno siete Pueyaso pueya maapue jiitianaa Jiitianajanaa. Janiyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ²iQuia maquenu quia jatate! iSuteja quia quiri! Quia cumaquiri noo pojori canapue te jatarinitiaja rishiyajaani. Quera cusonuyari. Janiyari Pueyasora quia miishano niquiquiaani. Majaari maninia na quiniu cua Pueyasora. ³Quiaacuajaari maninia niishitiojosaa-quiaari Pueyaso rupaa. Taa quia niishitiojosaaquiaricuajani, cuno quia niishiriohua. Quioojia quia tacatorohua Pueyasooqua, seetanujuanaa na rupaa tojjia quia quiniuria. Quiaa jaara suteja quiniu paniaquiri, janiyari canashiya-quiji quioqua niniutianiya juhua nohuasejojuani, quia jiyaniashacari maja naasucua juhuanajuaja cua tiuquiniu quiniutianihua. ⁴Quia jiitiasano pueyaji-nijinio cuniqui Sardis tiacajiniani, secaja nojorijinijinioori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curuushojiyaquishano janiyara. Naaratej, janiyari nojori cushiyotenutaniya cohuaqueya toqueni, cuata nojori rucuanefonura, cua rupuenaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuujiaa nojori quishacari. ⁵Canapue te naa sesa miiniu ruuretajacani cua tojjitiaja nojori quiniuucua, nojoriiri naa cohuaqueya toqueya cushiyotesocoriquianojuhuaj. Cunoori quiniutianiya tojetaarucujanaa sesa miyashijiacara cua jiyatesacari nojori.

Naajuhuj, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuj, janiyari nojori jaatianutaniya cua Queecuani, na seya tacojiriano, cua sequenura nojoriiri cua timitiasano pueyaniyojua. ⁶Cunora, cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera’”.

Filadelfia tiacajinia quiniaa Pueyaso pueya maanuucara naajione

⁷Jiyaniijia Jesucristoori socua cua sequeree:

—Filadelfia tiacajinia quijia cua seruucara quia naajiorejuhuaj, Pueyaso pueya maanu jiitianani. Naa quia sequere nojuaja: “Cua tojiri. Janiyacuajaari tojetaarucujanaa maninia mijiani, cua Que tojjia cua quiniuucua. Puetunu cua sequesanojuanaari seetanujuanaa. Jiyaniijiajanaa cua quiniuucua cua supuetana David niti, janiyari cua Que tiootiu riatataja jiitianani, cua saquiriojosano pueya cua tiuquinitianura cua Queecua. Janiya jaara cuno tiootiu riatareni, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. ⁸Janiyari puetunu quia miishanojuanaa niishiyani. Naajuhuj, janiyacuajaari juhua tiootiu riatarucuaa quioacuajini, cua rupaa quia poojotanura. Naacuajitij, tamasaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano tojjiaacuaja. Naajuhuj, majaari cua soojeaca pueya niquiara quia tamacanu quiquianu janiya. ⁹Naa maninia quia miiniuucua janiyaracuatej, janiyari naa maninia miiniutianiya quiarajuhuj. Janiyari noojiaqueya Satanás pueya

maanujinijinio mojuquetanijionutaniya quiocuarani. Cuno pojoriiri tama na cuaqueyajaaja sequeja, nojoriniaari seetanujuanaa Pueyaso pueya, Judiocuaca nojori quiniuucua. Naa nojori sequesaciritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuujia quia quiniuucua. ¹⁰Janiyari quia sequequiaarini maja quia tarinitianura quiria poonijionu, quiaa jaara naquiya miishaariquia. Quiaari seetanujuanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miiniutia nojori, janiyacuajaari jiyacari nia cojuanutaniyani. ¹¹Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacuajitij, quiaa jaara cucuaji catere, majaari Pueyaso niquitionu quiniutianiya quiarano na racatasano. ¹²Cante sesa miiniu samiritiaja saajani, cua rupaa tojijia na quiniuucua, janiyari jiyocuacaanu Pueyaso Secojoua tiajinia na nujuatenutaniya juhua morijiuni Pueyaso quishaquijianaa, ti cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuaaj, janiyari cuno pueyanocua naajiotanutaniya cua Que Pueyaso sesani, quiarinio cua sesajuhuaaj, cua Que Pueyaso tiaca sesanio. Cuno tiacacuajaari quiarinio Jerusalén* tiaca, jiyocuacaanuji roshinitiasaariquiano. ¹³Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera”.

Laodicea tiacajinia quiniaa Pueyaso pueya maanuucuaru naajionee

¹⁴Jiyaniijia Jesucristoori socua naa cua sequeere:

—Laodicea tiacajinia quijia cua seruucuaru quia naajiorejuhuaaj, Pueyaso pueya maanu jiitianani. Naa quia sequeere nojuaja: “Cua tojiri. Naa sequeyari noo pueyano cana sequesante seetanu rupaajanaacuajani. Puetunu na caminiujiushanojuanaa Pueyasojiniji quiarani, cunoori seetanujuanaa. Pueyasoori na shipinitiquiaari puetunu na shipinishano casaajanaa. Cunocuajaari janiya. Cunora, cua tojiri. ¹⁵Janiyari puetunu quia miishanojuanaa niishiyani. Quiaari najuhuaa quijia, quia miyaquiniuucua cua sequesano. Seetanujuanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. ¹⁶Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuanaa cua tojijia quiriquia, janiya maara quia timitiaren. Saniniuujia, najuhuaa cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitioyani. ¹⁷Quiaari tama sequequiaajaacujua: ‘Janiyari casamiriacani. Janiyari puetunu cua panishanojuanaa jiitiaani maninia mijia cua quiniuucua’. Maja cutaraari quia niishiniu quioojiaari cusosu. Janiyara, quiaari tojetaarucujanaa casamijiu, cariyojuaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. ¹⁸Cunora, janiyari quia numooteyani moseeca pueyanonaa, cua rupaa tojijia quia quiri, seetanujuanaa casamiriaca quia quiniuria. Naajuhuaaj, maninia mijia quia quiriquia cua cushitiniuria quiajaniya cohuaque toque, maja cararaatia quia quiniuria juhuasu. Naajuhuaaj, cua niishitiaja quia masere cutara, quioojia namijia riatenuura, seetanujuanaa maninia niquijia quia quiniuria. ¹⁹Janiyari puetunu cua panishano pueyajanaa nacasujani,

nojori saniitiojuajuhuj. Cunora, quioojia quia tacatore cucua. Tama quioojiaaja quia shiniujiurijuhuaj shamaatia cua tojjia quia quiniuria. ²⁰Cua tojiri.

Janiyari quioojia tiotitujiniji jiiquioonuu-jiyani. Cante cua tojiyani, nojuaja cuaara na tiotiu riataara cucuaji. Janiyacua nocua tiuquiumiani, nata cua miaquenu-
ra, shuquiriaatia cua pocoojonura nata.

²¹Janiyari cua Paraca shocotaquiaarini cua Que tojjia cua quiniucua. Naaratej, cua Queeri cua cajitiquiaari na shuriucua, Jiyaniijajanaa cajitujinia. Naajuhuj, janiyari Sesaaca shocotajaca cajitijionutaniya cua shuriucua, jiyaniijianucua nojori quiniuriajuhuaj. ²²Cante numaaracani, nojuaja cuaara tojiiria Pueyaso Sohuanu sequesano Pueyaso pueya maapuera”.

Juan niquishacari Jiyocuaaanu Quijiaari maniniuhuaqueetasaariquiaa

4 ¹Na nuhuaji, janiyari mauquiaarini. Janiyari saaja jiya cajiniocua tiotiu niquiquiaari riatasanoni. Shushajanaa cua tojishano rupaa juhua trompeta jonenenuni, cuno rupaajaari cua pacutequiaariuhua sequenu. Naa cua sequeereri:

—Miji quia tacama. Janiyari quia niquitiniutianiyani taa nio pa quishacari nuhuaji mijiria quiniaa miishaanutaniyani.

²Jiyacaritij, Pueyaso Sohuanuuri cucua niquiaari. Cua sohuanu tacaniquiaari jiyocuaaanuuri. Janiyari jiyacari Jiyaniijajanaa cajitiu niquiriini. Pueyanoori tii cajiriquiaa. ³Nojuajaari shanohua niquishano quiriquiaa, jiyanohua shacantuua juhua jaspe saajia, jiyanohua naatucajuhuaj, juhua cornalina saajia. Naashiiri na cajitiu caco nujuariquiaa. Jiyanohua shacantuua quiriquiaari neeruua, pocojuanaque juhua esmeralda saajia. ⁴Janiyari socua

veinticuatro cajitiucua niquirii Jiyaniijajanaa cajitiu shocua. Tii cajituriquiaari veinticuatro niishijiaca jiyaniijianucua.

Cohuajaque toqueya cushiyonuuriquiaari, orojiniji shipinijosano nacaqueyano.

⁵Jiyaniijajanaa cajitujiniji, miacanaari nunujuriquiaa. Jiyanohua majacuriquiaajaariuhuj. Jiyaniijajanaa cajitiu tacoji, tii noshiquoriquiaari siete samari.

Cunocuaajaari siete Pueyaso Sohuanu, puetunu tiqiyocujanaa quijia na quiniucua. ⁶Jiyaniijajanaa cajitiu tacoji, juhua jiyanohua puereetuua caminiaari quiriquiaajuhuj, juhua cohuaja motiiquio maatia niquishiyari na tamajiria.

Jiyaniijajanaa cajishaqui, cuatro saminio casaari quiriquiaajuhuj, puetunu na shocujanaa. Nojoriiri jiyanohua queraatia namijiaaraca quiriquiaa, na jiriquiaacumaji, na nijiniaacumajinio.

⁷Cuno cuatro saminiucua casaari tamaatia niquishano quiriquiaa tamonujiniji.

Niquiriyatuuri juhua juuruu sare niquishano quiriquiaa. Tamonuuri juhua seru juunu caya niquishano quiriquiaa. Tamonu casaa jiquiocoori juhua pueyano jiquioco niquishano quiriquiaa. Tamonuuri juhua surohua miooru jaano niquishaariquiaacujua. ⁸Puetunu cuno cuatro saminio casaajanaari seis nesuhua-raca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niquitajia, na nijiniara na niquitajiano. Nojoriiri pueyaracaanu Pueyaso maniniuhuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—iJiyaniijajanaanaa, quiaari saa maninija, jiyanohua maninia, tojetaarucujanaa maninia mijia! Quiaacuaajaari Pueyaso, puetunu cumaacaracajanaa. Quiaari quijiajuhuanajaj. Majaari quia supueni quiquiaari. Quiaari quia pueyacua tacateriquianohua.

⁹Cuno cuatro saminio casaari naa pueyaracaanu maniniuhuaqueetariquiaa Jiyaniijajanaa, na cajituijinia cajiyano, pueyaracaanu Jiyaniijajanaa quiriquireano na quiniuucua. ¹⁰Naa pueyaracaanu cuno cuatro saminio casaa timitiasacari Jiyaniijajanaacuaatej, cuno veinticuatro niishijiaca jiyaniijianucuaari jaarajaaja mojuquetacoqueequiaa Jiyaniijajanaa-cuara. Nojoriiri na tuhuajaa jartaqueequiaa Jiyaniijajanaa cajitui pajama, naa na sequenuta:

¹¹—Nioori quiara, Jiyaniijanaa. Quiaa cutaraari Jiyaniijajanaa, maja canaa. Quiaacuaajaari canaa Pueyaso. Quiaa cuaara timitiasaaria pueyaracaanu, jiyanoahua maninia shacantuuca quijia quia quiniuucua, puetunu cumaacaracajanaa quia quiniuucuaajuhua. Quiaacuaajaari puetunu casaajanaa shipiniquiaari. Tama quia paniniuucuaajaaja, quiaari na shipiniquiaari.

**Rupanacujusano naajioneejiniji
pohuatasano, Borrego Niquiojuaajini**

5 ¹Na nuhuaji, janiyari Jiyaniijajanaa cajituijinia cajinia juaashiquiajinia niquiriri naajioneeni. Na miaquetajara na cacariquiaari. Cuno tucuanee naajioneeri jiuniososano quiriquirea. Naajioori nocua quiriquirea, na nijinia, na jiniacumano. Cuno naajioneejinia, siete naajioori tii naajiotasano quiriquirea. Cuno siete naajio coteejajiniani, juhua roshitia rupanacujutasanoori quiriquirea. ²Jiyaciritij, janiyari jiyanoahua cumaacaraca Pueyaso seru niquiriri. Naa nequesoreeriquiaari jiyanoahua na nacanuta:

—¿Cante seetanujanaa maninia miiija cutarani? Cuno cuaara rupartaara rupanacutasano, na riatanura cuno naajione.

³Jiyaciritij, majaari quenaaja maninia miiija quiniu quiquiaari jiyocuaaanu, jiyajinia, jiya cariquimiano na riatanura

cuno jiuniososano naajione. Tojetaarucuaajanaa shaaqui quiquiaari cuno naajione serojoriquiano. ⁴Naaratej, janiyari jiyanoahua nujuqueriquiaani, tojetaarucuaajanaa shaaqui maninia miiija quiquiaquiniuucua cuno naajio na riatanura, na serojonuranio. ⁵Cua nujuquesacari, tamonu cuno veinticuatro niishijiaca jiyaniijianucuaajiniiniori cua sequeree:

—Maja nujuquenu. Quia cumantare.

Quia niquiri. Pa Jiyaniijajanaacuaajaari jiyanoahua cumaacaraca. Tariucuaaanu Pueyaso Rupaajinia, nojuacuaajaari miriqui sequeshiya Juurunu saretu, Judá niquiohuacuajinio superiquiano, Jiyaniijajanaa na quiniuria na supuetana David niti. Nojuacuaajaari pa paraca Satanás shocotana, tojetaarucuaajanaa Jiyaniijia Pueyaso tojjia na quiniuucua. Naaratej, nojuaja na naata cuno siete naajio coteeja rupanacujutasano rupareetanu na serojosocoriquiano.

⁶Jiyaciritij, janiyari Borrego Niquiojua niquiriri Jiyaniijajanaa cajitui tajoji nujuuano, cuno cuatro saminio casaa tajiiniano. Cuno veinticuatro niishijiaca jiyaniijianucuaari na shocua quiriquireaajuhua. Borrego Niquiojuaari seetanujanaa juhua mosano samiitiano-hua niquishaariquiaa. Nojuajaari siete jiyaniijia tuhuajaaraca quiriquirea, puetunu cumaacaracajanaa na quiniuucua. Naajuhua, siete namijiaaraca quiriquireaari. Cuno na siete namijiaani, cunocuaajaari Pueyaso Sohuano, Pueyaso jiyaramiquishano puetunu mijirijajanaa. ⁷Cua niquishacari, Borrego Niquiojuaari Jiyaniijajanaa cajituijinia cajiyano juaashiquiajiniji jiuniososano naajione masetaree. ⁸Nojuaja jaara cuno naajione cacariquiaa tari, cuno cuatro saminio casaari nocuaa mojuquetacoquiaari, cuno veinticuatro niishijiaca jiyaniijianucuanio. Puetunu nojorijianaari taquiniijosano casaa jiitiriquiaa.

Naajuhua, orojiniji shipinijosano suhuococua mueetacoriqiaari, mishaja shanohua jaanutajata. Nojori mueetaco-sano shanohua jaanutajani, cunoori nio jiyajiniji Pueyaso muerasu secojonuusano Pueyaso. ⁹Nojoriiri Borrego Niquiojua jaaquequejotariquiaa nio quiarinio jaaquequejosano:

—Saaja quiajanियari seetanujuaanaa maninia mijia. Naaratej, quia naata cuno naajionee patanu quia rupareetanura na rupanacujusano. Quiaari jiyano-hua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueypuejinijinojuanaa, puetunu tamaatia rupaa pocuajacajinijiniojuanaa, puetunu tiacajinijinojuanaajuhua, puetunu jiyacajinijinojuanaano. ¹⁰Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueya-cuara secojona, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiri-quianojuhua.

¹¹Na nuhuaji janiyari tojetaarucujanaa jiyano-hua jiyano-hua queraatia Pueyaso seya niquiriini. Jiyaniijiajanaa cajitii shocua mariquiaari, cuno cuatro saminio casaa shocujuhua, niishijiaca jiyaniijianucua shocuanio. Nojoriiri jiyano-hua queraatia quiquiaari, juhua jaaquia, serojiyaquishoo. Janiyari nojori tojirii pa Jiyaniijia Jesu maniniuhuaqueetanoni. ¹²Nojoriiri naa na sequeturiquiaa nacanuta:

—iPa Jiyaniijiaari jiyano-hua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiiria Jiyaniijiajanaa pueyaraca-

nura. Saaja nojuaja cuaara jiitiaara puetunu casamijiana. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuaara naa quiiria pueyaracaanutej. Puetunu quiijia casaajanaa cuaara tojitiaara pa Jiyaniijia. Saaja nojuaja cuaara quiiria jiyano-hua timitiasa-no. Puetunu quiijacajanaa cuaara na maniniuhuaqueetaara.

¹³Naajuhua, janiyari puetunu Pueyaso shipinishano saminio casaajanaa tojiriini, jiyocuacaanu quiijia, jiyajinia quiijia, jiya cariquimia quiijacajuhua, shoniniacu caminiajinia quiijacanio. Puetunu nojorijianaari jiyano-hua na timiniutia sequeturiquiaa:

—iCuno, na shacantuuca cumaacajinia cajiyani, Borrego Niquiojuanio, nojori cuaara maniniuhuaqueeta-saaria pueyaracaanu! iPuetunu casaajanaa cuaara tojitiaara nojori pueyaracaanu! iNojori cuaara timitiasaariajuhua! iSaa nojorijia cuaara na cumaaca jiitiaara pueyaracaanura!

¹⁴Jiyacaritij, cuno cuatro saminio casaari nojori riuhaneriquiaa saniniujia:

—iTaaquiriirini! iCuaara naa quiiriatej!

Cuno veinticuatro niishijiaca jiyaniijianucuaari saniniujia mojuquetacoqueecujua cuno pueyaracaanu Quiijiaacuara, nojori na shuquiritia-nura.

Jiuniososano naajionee-cua seis rupanacujutasano rupareetasacari

6 ¹Na nuhuaji, cua shootiasacari, Borrego Niquiojuuari coteenujuanaa cuno naajioneejinia rupanacutasano rupartaree. Naa miiriiri cua niquitishaa-nura taa mijiria quinia miishaanutaniya

jiyanohua naquiyani, quera nio jiya puequesacari. Jiyacaritij, janiyari tamonu cuno cuatro saminio casaajinijinio tojirii sequeyanoni: “iMiji!”. Na pocuanuuri juhua miacana majanu tojishano quiriquiaa. ²Naa na sequesacaritij, janiyari cohuajohuana caballo niquirii nocua canujiyanoni. Na nijinia cajiniaari balista cacariquiaa. Jiyacaritij, jiyaniijia-ra shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

³Na nuhuaji, Borrego Niquiojuaari segundo* rupanacutasano rupartaree. Janiyari jiyacari segundo saminio casaajinijinio tojirii sequeyanoni: “iMiji!”

⁴Naa na sequesacaritij, naatuhuana caballoori nocua canujumaa. Na nijinia cajiniaari cumaaca niqutiosaare. Naacua-jitij, nojuajaari mijiria quijiaa tojetenutaniya tama nojori miaquetoojo-nurajaaja. Cunora, nojuajaari puereetunee nijiniaquetucujaja mueruu niqutiosaaree.

⁵Na nuhuaji, Borrego Niquiojuaari tercero* rupanacutasano rupartaree. Janiyari jiyacari tercero cuno saminio casaajinijinio tojirii sequeyanoni: “iMiji!” Jiyacaritij, janiyari mueruhuana caballo niquirii nocua canujiyanoni. Na nijinia cajiniaari niiquia shanacujutaja jaasutetariquiaa, mijiria quiniaara mijajau shanacujusaanura nojori serotasaanura. ⁶Jiyacaritij, janiyari cuno cuatro saminio casaajinijini rupaa tojirii naa sequeyanoni:

—Niquiriyatu juuca poonijionu sami, cuara niqutiosaaria saaja niquiriyatu kilo trigo jajau. Jaara trigo jajau paniyaquiri, cuara niqutiosaaria tres kilo cebada jajau. Saniniuujia, majaari shiyocua shanacujunu cutara, vinonio*. Cunocujaja queraatia quiniutianiya cutara.

⁷Na nuhuaji, Borrego Niquiojuaari cuarto* rupanacutasano rupartaree. Jiyacaritij, janiyari cuarto saminio casaajinijinio tojirii naa sequeyanoni: “iMiji!” ⁸Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuana”. Macunucua Quiquoori na neteyotariquiaa, Cusojuana puecoosano na rionjura na miitiasocoriquiano. Nojoriiri cumaaca niqutiosaaree jiyanojua queraatia pueya na cusojuanura. Naacuaajitij, jiyanojua queraatia pueyari puecoosaanutaniya miaquetoojosacari. Tamasacaari cusununutaniya jiyanojua miaajesacari. Tamasacaari paaqueja cusunu cusununutaniya. Naajuhua, tamasaari sareya sootesaanutaniya. Sacocua satejosaanutanijajaarihuaj. Naacuaajitij, jiyanojua queraatia pueyari cusojuasanutaniya. Na nuhuaji, puetunu macunucujajanaa jaara serojosaare, puetunu nojorijianaari na cajiniocua quiniutianiya puetunu mijiria quijiaa pueya cajiniocujajinijiojuanaa.

⁹Na nuhuaji, Borrego Niquiojuaari quinto* rupanacutasano rupartaree. Jiyacaritij, janiyari Pueyasocua catijiasaqui juhuacutu cariquiaco niquirii Pueyaso pueya sohanuhua, noo pojori canapue puecoosaquiaricujajani Pueyaso Rupaa tojijiaa nojori quiniucua, Jesucristojiniji nojori pohuatanucujajuhua. ¹⁰Jiyacaritij, nojoriiri naa jiyanojua nacaree:

—iJiyaniijiana! iQuiaari saa maninija! Quiaari quia sequesano mijia seetanujua-naa. ¿Taa quia tarishiniutianijajaara canaa puecoona quia nequesoreenurani, nojori quia naminiuria canaacua saniniuujia?

¹¹Jiyacaritij, puetunu nojorijianaari cohuajaque toqueya niqutiojosaaree. Nojoriiri naa sequesaaaree:

—Socua rupaquijia nia samaaterejaara, Pueyaso saquiriojosano niarta Pueyaso

pueyajinijinio cuaara puecoosaaria nia shirijajaatijia, taa nia puecoosaaquiaari-cuaani.

¹²Na nuhuaji, Borrego Niquiojuaari sexto* rupanacutasano rupartaree. Jiyacaritij, rijiaari jiya jiuuquiujutiaree jiyanoehua. Janiyari na niquiriquiaani. Pananuuri mueruucara quiqui juhua muerueque toque. Racaari naatuucara quiqui juhua nanaca. ¹³Riyari jiya cajiniocuaji toteree jiyocua, taa satuna totequiaa jiyanoehua paratucaricuaani. ¹⁴Jiya cajiniocuuari shaajequeejuhua, juhua tucuanee naajioneeri jiuniosaa-ree. Shoniniacu caminiajinia, puetunu jiya tucuaatajajanaa, puetunu tuhuana-nuhuaajuhua, puetunu cunojuanaari jiyajeetaquee na nujuatusaqui. ¹⁵Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhuaajinhua. Naa jamaatiu-shiijiaariuhua noo pojori: pueyacua paaretajaca na cumacatej, soldadoehua jiyaniijianucua, jiyanoehua casamiriaca pueya, pueya tojishano pueya, poonitijio-sano pueyajuhua, puetunu narta pueyajanaano. Puetunu pueyajanaari naa mashiriquiaa juucua. ¹⁶Nojoriiri tuhuananuhua sequeriquiaa, sainio:

—iCanaacua nia tiyare canaa nia jamonura cunoocuaji, na cajituijinia cajiya na shacantuuca cumacajiniani! iCanaa nia jamojore maja na niquiara canaa quiniuria, naajuhua, maja Borrego Niquiojua saniitionura canaa, jiyanoehua na juaashacari! ¹⁷Quiarijiacuajaari Pueyaso saniitionu juuca. Jiyanoehua puereeta. ¿Cante na naata na nujuatanuni? Shaaqui.

**Pueyaso saquiriojosano pueyajiniji
pohuatasano, Israel niquiohuacuajinio
supueno pueyajinijinio**

7 ¹Naa cua niquiniu nuhuajitij, janiyari socua cuatro Pueyaso seya niquirii nio jiya shocua nujuatiuyano

tuhuaquini, pananu muetasamaji, na tiuquishocora, na muetasamaji na muenecara, na miaquetajaranio. Nojoriiri na nujuatusaqui paratu tenujuriquiaa maja na piyarojonura jiya, shoniniacu caminia, nacuhuanio. ²Jiyacarijuhuaj, janiyari socua tamonu Pueyaso seru niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacua nacaree jiyanoehua, noo pojoriicua canapuate cumaacaraca quiriquiaacuajani nojori sesonura jiya, shoniniacu caminia- nio. Naa nojori sequereeri:

³—iCuaara! iMaja juhuanajuaja jiya nia sesonu, shoniniacu caminia, nacuhua- nio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

⁴Janiyari jiyacari tojiriini taa pueyate na jiniji jirioosaareeni. Puetunu supueta- na Israel doce niquiohuacuajinio supueno pueyapuejinijioori ciento cuarenta y cuatro mil pueya jirioosaaree. ⁵Naacuaji- tij, supuetana Judá niquiohuacuajinio supueno pueyajinijionio, doce mil pueyari jirioosaaree. Supuetana Rubén niquiohuacuajinio supueno pueyajiniji- nio, doce miljuhuaj. Supuetana Gad niquiohuacuajinio supueno pueyajiniji- nio, doce miljuhuaj. ⁶Supuetana Aser niquiohuacuajinio supueno pueyajiniji- nio, doce miljuhuaj. Supuetana Neftalí niquiohuacuajinio supueno pueyajiniji- nio, doce miljuhuaj. Supuetana Manasés niquiohuacuajinio supueno pueyajiniji- nio, doce miljuhuaj. ⁷Supuetana Simeón niquiohuacuajinio supueno pueyajiniji- nio, doce miljuhuaj. Supuetana Leví niquiohuacuajinio supueno pueyajiniji- nio, doce miljuhuaj. Supuetana Isacar niquiohuacuajinio supueno pueyajiniji- nio, doce miljuhuaj. ⁸Supuetana Zabulón niquiohuacuajinio supueno pueyajiniji- nio, doce miljuhuaj. Supuetana José

niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

**Cohuajaque toqueya
cushitishano pueya maanu**

⁹Naa cua niquitishaanu nuhuajitij, janiyari jiyanoehua queraatia pueya niquirii maanoni juhua tereya. Nojoriiri puetunu nio tiqiyocua jiyacajinijiniojuanana pueya quiriquiaa, puetunu tamaatiuucua pueyapuejinijiniojuanaano. Quiriquiaajaariuhua puetunu tamaatia rupaaca pocuajacajinijiniojuanaa, puetunu tiqiyocua tiacajinijiniojuanaano. Naa tojetaarucujanaa jiyanoehua queraatia nojori quiniuucaatej, majaari na naata serojosaanu quiriquiaa. Nojoriiri Pueyaso shacantuuca cajitiiu tacoji nujuaturiquiaa, Borrego Niquiojua tacojinio. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuuca, nojoriiri juhua teruhua-najaquera niquishano mueetacoriquiaa.

¹⁰Puetunu nojorijianaari na mariyata sequeriquiaa na nacanuta:

—iJiyanoehua maniniaari pa Que Pueyaso, na shacantuuca cajitiiu-nia cajiyani, Borrego Niquiojuajuhuaaj. Nojoricuajaari pa jiyanoocuiaari, tojetaarucujanaa quiariniora jatanishano pa quiniuria!

¹¹Naajuhuaaj, puetunu Pueyaso seyajanaa, canapuate shacantuuca cajitiiu shocua nujuaturiquiaacuajani, niishijiaa jiyaniijianucua shocuajuhuaaj, cuno cuatro saminio casaa shocuanio, nojoriiri Pueyasooacara jacamaturee nojori timitianura nojuaja. ¹²Pueyaso na timitiatuacari, naa sequetureeri:

—iTaaquiriirini, seetanujuaanaacuaj!
iCanaari pueyaracaanu quia

maniniuhuaqueetanutaniyani!
iQuiaacuajaari canaa timitiasano!
iSaaja quiajaniyari seetanujuaanaa niishijia cutara! iPaacarasho, canaa Pueyasonaa! iQuiaa cuaraa tojishaaria pueyaracaanu! iQuiaari canaa Jiyaniijiajanaa pueyaracaanura! iQuiaari puetunu cumaacaracajanaa maninia quia jiitianura quia shipinishano!
iCuaara naa quiria pueyaracaanu, pueyaracaanutej!

¹³Jyacaritij, tamonu cuno veinticuatro niishijiaa jiyaniijianucujinijinioori cua nequesotaree:

—¿Canapuate cuno pojorini, cohuajaque toqueyaracani? ¿Tejenote nojorini?

¹⁴Janiyari na riucaaree saajani:

—Quiaa cutara na niishiya, jiyaniijianaa.

Cua sequereeri:

—Nojoricuajaari jiyajinijinio pueya. Jiyajinia nojori quishacarjia, nojoriiri cuno jiyanoehua naquiya miishacari rejeretajaca quiquiaari. Nojori tiuuniuucua Borrego Niquiojuaacua, nojoriiri puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacuajitij, nojoriiri cohuajaqueya toqueya cushiyonuya. ¹⁵Naa Pueyaso jiyanooshano pueya nojori quiniuucaatej, nojoriiri Pueyaso cajishaqui tacoji quijiaa. Nojoriiri pueyaracaanu tii Pueyaso Secojojua tiajinia miiquiaa Pueyaso panishano, juuca, niucuanio, nojori timitiasacari nojuaja. Na shacantuuca cumaacajinia cajijiani, nojuajaari na cumaaca teutenutaniya nojori caco, jatiqui na quiniuria nojoritia pueyaracaanu.

¹⁶Naacuajitij, majaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhuaaj, majaari socua nasaatia pananu jartanu nojori niishiniu quiniutianiya. ¹⁷Borrego Niquiojuacuajani,

Jiyaniijiajanaa cajitíu jiuuijiajinia cajijiani, nojuajanaari nojori jítianutaniya juhua tama na borregohuajaja. Nojuajaari nojori rucuanejotanutaniya, nojori na raatenura pueya samiitianijia mohuaca pacartajajiniji, pueyaracaanu shuquiriaatia quijiaa nojori quiniuria. Pueyasojuanacuajaari nojori namijiaa tujuunutaniya nojori namijiajiniji.

Séptimo rupanacutasanojiniji pahuatasano, shanohua jaanutaja patajajinijinio

8 ¹Borrego Niquiojua jaara séptimo* rupanacutasano rupartaree, cuno naajionee saacatanura puetunujuanaa, tojetaarucujanaa sanaacara quiquiri jiyocuaanu pueyaracaanura. Maja cua niishiniu, media horaruhua*. ²Na nuhuaji, Pueyaso tacoji, janiyari siete Pueyaso seya niquirii nujuatiuyanoni. Nojoriiri jiyacari siete trompeta niquitiosaaaree. ³Na nuhuaji, socua tamonu Pueyaso seruuri shanohua jaanutaja pataja pamaa, orojiniji shipinishano. Orojiniiji shipinishano Pueyasooacara catijiaja casaa tacoji nujuaseeri, Jiyaniijiajanaa cajitíu tacoji. Queraatia shanohua jaanutaja niquitiosaa-reeri Pueyasooacara na catijianura. Jaanutajaari catijiasaariquiano puetunu Pueyaso pueya secojonuusanotajanaa, Pueyasooacara na jaanujunura cuno catijiaja casaajiniji. ⁴Naacujitij, Pueyaso seruuri Pueyaso pueya secojosano tapaniriji Pueyasooacara, shanohua jaanujua najacata. ⁵Na nuhuaji, cuno Pueyaso seruuri catijiaja casaajiniji na shanohua jaanutaja pataja mishinirii nishiyata. Jiyanoehua na majiriataree nio jiyacuaari. Miacaanaari ritia nunujuquee. Jiyanoehua majacureeri. Jiyanoehua cojuatunereeri. Rijiaari jiuquiujiutiareejuhuaj.

Trompetaa jonenejosacari

⁶Cuno siete Pueyaso seya, trompetaa cacariquiaani, nojoriiri jeeacanecoree na

trompetaa na jonenenura. ⁷Jiyacaritij, niquiriyatu cuno Pueyaso serujinijinioori na trompeta jonenenu coteeree. Jiyacaritij, miacanajaa shiniituijiaacaari, mariyata mani cojtitishano nanacata jiyocua jartasaaree. Jiyari quera na cajiniocua cateree, puetunu na nacuhua-tajanaa, na jiyasocuatania.

⁸Segundo Pueyaso seruuri na trompeta joneneree. Jiyacaritij, casaa juhua puereetuca tuhananu noshiyanoori shoniniacu caminiajinia jatsaaree. Quera shoniniacu caminia cajiniocuaari nanacarra quiqui. ⁹Puetunu shoniniacu caminiajinia quijiaa casaajanaari, quera na cajiniocua cusonuuree. Naajuhuj, shoniniacu caminiajinia ruhanetasano puereetuca buqueyajinijinioori, quera puetunu na cajiniocujanaa sesosaaree.

¹⁰Tercero Pueyaso seruuri na trompeta joneneree. Jiyacaritij, puereetuca rijiaari jiyocuaanuquij tiqui, jiyanoehua nishituuca juhua shucuenaja jaamasu noshitishano. Tiyareeri quera na cajiniocua nio jiyacua moocujania, mijiria cuariyajinijuhuj. ¹¹Cuno rijia sesaari quiriquiaa “Piiquia”. Cunora, tee cuno rijia tiyareeni, puetunu cuno mohuacajanaari piiquiara quiqui. Pueya ratusacari cuno mohuaca, queraatia pueyari saaja cusonuuree.

¹²Cuarto Pueyaso seruuri na trompeta joneneree. Jiyacaritij, casaari pananu-cua pitiaree, racaaca, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiqui. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuj, riya, racanio, majaari na cuhuatanu quiriquiaa quera niucua cajiniocujuhuj.

¹³Na nuhuaji, janiyari juhua puereetu-ca surohua miooru niquirii jiya

cajiniocuani. Na jaasacari naa nacariquiaa jiyanoahuari:

—iPuereeta, puereeta, puereeta!
Seetanujuanaa jiyanoahua puereeta quiniutianiyari jiyacua quijiaca pueyara, jiuujianaraca curecono Pueyaso seya jaara jonenere, canapue te joneneyaquiya-jaa juhuanojuajacuajani.

Quinto trompeta jonesesacari

9 ¹Na nuhuaji, quinto Pueyaso seruuri na trompeta joneneree. Jiyacaritij, janiyari jiyocuacaanu jiyocua tinio rijia niquiriini. Cuno rijiaari tiotiu riatataja niquitiosaaree, puequeetuuju raa na riatanura. ²Na riatasacari, najacaari nojomaa juhua puereetuca cuhuariquia sesacari. Pananu namijia tiomaari. Jiya cajiniocuara mueruucara quiquijiuhuaj. ³Sequeruuri cuno najacajiniji mueratuumaa. Puetunu nio jiyacuajanaa paaquemaari. Sequeruuri cumaaca niquitiosaaree nojuaraca na quiniuria juhua turucuaniniu. ⁴Sequeruuri rootasaaree maja nojori miaquenura jiyasocua, nacuhua jaamasujuhuaj, puetunu moritajaca jaamasunio. Sequerucutaraari jiyaramiquishaare puetunu pueyapuejanaa na sojonura, canapue te na jiniji jirioyaquishoo quiriquiaa Pueyaso sesatacuajani. ⁵Sequeruuri rootasaareejuhuaj, maja nojori cusojuanura pueya. Cinco raza cuara nojori shocojora cutara, pueyaracaanu sequeru saashi noosacari. Cuno sequeru saashiiri juhua turucuaniniu saashi noonutaniya.

⁶Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanoahua na shaajenu panishacari juucua, nojoriiri saaja rishiniutianiya, jiyanoahua naquiya nojori miishacari.

⁷Sequeruuri puereeta niquishano quiriquiaa juhua miaquetoojonura jeenucuasano caballohua. Sequeruuri

casaa jiitariquiaa na nacajinia juhua jiyaniijianucuaa orojiniji shipinijosano nacaqueya. Nojori jiquiocoori juhua pueyano jiquioco niquishano quiriquiaa. ⁸Nojoriiri juhua maaji muecacaraca quiriquiaa, tucumuejarujuri. Juhua juurunu sare quiacaraca quiriquiaajaariuhua. ⁹Nojori jiriquiaqueeri cumueeca quiriquiaa juhua turtuco. Nojori jaacuatusacari, na nesuhuari jiyanoahua cojuatuneriquiaa juhua caballohua jayotasacari queraatia rucuanejotaruhua, miaquetoojonuucua na netecuatusacari. ¹⁰Cuno sequeruuri juhua turucuaniniu nojuacaraca quiriquiaa. Jiyanoahua noonacuracajuhuaj. Jaara nojori saare, cunoori quiquiaari nojori na noonura cinco raza. ¹¹Cuno sequeruuri jiyaniijia- raza quiriquiaa. Nojuajaari Sesaaca seru. Cuno puereeta puequeetuuju raa camarujaariuhua. Hebreo rupaaajinia, na sesaari “Abadón”. Griego rupaaajinia saniniuuja “Apolión”. Pueyano rupaaajinia saniniuuja, nioori sequeya “Pueya Puecoona”.

¹²Janiyari naa niquitishaareeni taa coteenujuanaa naquiya miishaanu quiniutianiyani, cuno jiuujianaraca naquiya miishocoriquianojiniji. Socua caapiquiiri cureyajaa na nuhuajiria.

Sexto trompeta jonesesacari

¹³Sexto Pueyaso seruuri na trompeta joneneree. Janiyari jiyacari rupaa tojirii pocuaanoni, shanohua jaanutaja catijiaja juhuacutu cuatro tuhuajaa tajiniji, Pueyaso taccoji nujuatajani, orojiniji shipinishanoni. ¹⁴Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarojore, puereetuca Eufrates moo shuriucua morojosano quiyani.

¹⁵Jiyacaritij, cuno cuatro Sesaaca seyari samaacarojosaaree jiyanoahua queraatia pueya nojori puecoonura, quera na

cajiniocua puetunu mijiria quijiaca pueyajinijiniojuanaa. Cuno Sesaaca seyari tariucuaaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijiara. ¹⁶Janiyari tojiriini cuno cuatro Sesaaca seya soldadohuari, doscientos millones* pueya quiriquiaa saa caballohuaracaja.

¹⁷Janiyari cuno caballohua niquitishaa-ree juhua cua maquenujiniani, na nijinia cajitiuniaanio. Jiyanhua tamaatia niquishano quiriquiaari. Puetunu nojori jiriquiacajanaari turtucojiniji shipinijosano casaata mishiquiojosano quiriquiaa. Cuno, nojori naatiyaquishaanuucujaji nojori cushiyosano turtuconi, cunoori puereeta niquishano quiriquiaa; naatuuca juhua mani, nentuuca juhua jacinto saajia, pocojuanaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhua, azufrenio. ¹⁸Cuno jiuujianaraca puereeta casaata quera na cajiniocua puetunu pueyajinijiniojuanaari cusojuasaaree. ¹⁹Naacujitij, caballohuari cumaaca jiitariquiaa na rupaama, na pitiujiniajuhuaj, nojori puecoonura pueya. Na pitiucuaari juhua sacocua niquishano quiriquiaa. Juhua sacocua nacacaraca quiriquiaajaariuhua pueya na sajitiajara.

²⁰Cureeno pueya, canapuate maja na puecoosaanu quirii cuno jiuujianaraca puereeta casaatani, nojoriiri sesa miiniu tarinitiaaquiriquiaa saaja. Nojoriiri samaruhua secojonu tarinitiaaquiriquiaa. Naajuhua, nojoriiri orojiniji shipinijosano casaa shuquiritariquiaa Pueyaso niti, platajiniji shipinishano, broncejiniji, saajiajinijijuhua, macajinijinio. Puetunu cunojuanaa, nojori jiyatesano tama na pueyasohuarajaajani, cunoori maja na

niquiniu. Majaari na tojinu. Majaari na rucuanenujuhuaj. ²¹Naajuhua, majaari pueya tarinitianu quiriquiaa narta pueya monu, shimiojonujuhuaj. Naajuhua, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunujuhuaj. Nohuasejonu tarinitiatuayaquiriquiaajaariuhua.

Pueyaso seru mueetasano tucanee naajioneeniyojuajiniji pohuatasano

10 ¹Na nuhuaji, janiyari socua tamonu jiyanhua cumaacaraca Pueyaso seru niquirii jiyocuacaanuji roseyanoni. Cohuaja najacajinia cuhuajaa-tiariquiaari. Na nacaacua camarucuteriquiaa naashiiri. Na jiquiocoori jiyanhua shacantuuca quiriquiaa juhua pananu. Na cashacucuaari juhua mani niquishano quiriquiaa, naatej, taa mani nujuua na noshishacaritij. ²Na miaquetajara mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaacuaari. Tacujua niaree nio jiyacua saniniuurijia. ³Nocua na nujuasacari, jiyanhua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. ⁴Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuacaanuji naa cua sequeyano saajani: —iMaja pueya niishitiniu cuno siete miacana sequesano! iMaja na naajiotanu! Tama quioojiajiniaaja quia racatare.

⁵Jiyacaritij, Pueyaso seru cua niquishano shoniniacu caminiaacua nujuaanoni, nio jiyacuajuhua, nojuajaari na miaquetajara na juaashiquia shiitioree jiyocuacaanu, seetanujuanaa na sequenu-ra. ⁶Naa sequeereeri:

—Cuno, pueyaracaanu Quijiani, nojuajaari jiya cajiniocua shipininia, jiya shipininia, shoniniacu caminia shipininia-juhuaj, puetunu tii quijiaca casaajanaa shipininiano. Nojuajaari seetanujuanaa naa cua pohuataniya: “Majaari tari na tarishiniu quiniutianiya. ⁷Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishano-juanaari tari tohuatesano quiniutianiya. Naa quiniutianiyari taa na pohuataquiaari na sequenu panishano caminiujiuniaa pueyacuajani”.

⁸Cua tojishano rupaa jiyocuacaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniniacu caminiaacua nujuaani, jiyacuanio. Nojuaja quia masetasee cuno riatasano naajioneeniyojua, na mueetaani.

⁹Janiyari Pueyaso seruucua quiaareeni. Janiyari na sequeseeni na naajioneeniyojua na niquitionura janiya. Cua riuacuareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuurijia. Cunoori, pueya na saniitotaja rupaa na quiniuucua.

¹⁰Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaquereeni. Seetanujuanaa shoqueeca quiriqiaari juhua samiyatu. Cua miasacari, cua seecojinia jatasee piiquiarari.

¹¹Jiyacaritij, janiyari naa sequesaaareeni:

—Quiocua Pueyaso sequesano caminiujiurihuhua pohuatanu queraatia pueyapue niquiara, queraatia tamaatia jiyacajinia quiniiaa niquiara, queraatia tamaatia rupaaca pocuajaca niquiarajuhuaj, queraatia jiyaniijianucua niquiaranio.

Caapiqui Pueyaso sequesano caminiujiuniaa miishanojiniji pohuatasano

11 ¹Na nuhuaji, janiyari tia shanacujutaja naajua niquitosaaareeni, juhua nataca niquishano. Janiyari naa sequesaaareeni:

—Quiarijia cutara quia quiaare Jerusalén tiacajinia. Tii nujuataja Pueyaso Secojojua tia quia shanacujusee quia shanacujutajata, orojiniji shipinishano shanohua jaanutaja catijiajanio. Quia serojorejuhuaj puetunu Pueyaso secojonuujuacajanaa tii. ²Maja cutaraari quia shanacujunu Secojojua tia carijinia-cuma. Cunocujajaari taucuaa niquitosaarucuaa tari. Pueyaso soojeaca taucuaacari Pueyaso saquiriojosano na tiacarano jiitianutaniya pueyaracaanu, cuarenta y dos raca cuara na shocojorejaatijia. ³Janiyari caapiqui cua saquiriojosano pueya jiyaronutaniyani, janiyajiniji nojori pohuatana pueya niquiara. Nojoriiri janiyajiniji pohuatanutaniya cuara shocojorejaatijia mil doscientos sesenta juuca. Nojoriiri cocuaque toqueya cushiniutianiya taa pueya cushiyoquiaacuajani nojori taraajesacari.

⁴Cuno caapiqui janiyajiniji pohuatanaani, nojoriiri cuno caapiqui olivo naana, tariuacaanu Pueyaso Rupaajinia pohuatashiyacuajani. Naajuhuaj, nojoriiri cuno caapiqui samari nujuatacojua, Jiyaniijajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijiajuhuaj. ⁵Tamonu jaara sesa miiniu paniri cuno caapiqui pueya, nojoriiri na paraa catijianutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapute nojori miiniu paniya sesa juucuacuajani. ⁶Nojori, janiyajiniji pohuatanaani, nojoriiri cumaaca jiitianutaniya maja na

nitiniuria maru pueyaracaanu mijiria nojori pohuatasacari Pueyaso rupaa. Naajuhuj, nojoriiri cumaaca jiitianutaniya mohuaca na jataniniuria nanacara. Nojoriiri cumaaca jiitianutaniyajuhuj nojori sesonura jiya puetunu puereeta tamaatia casaatajanaa. Nojoriiri pueyara-caanu naa miijionutaniya nojori panishacari. ⁷Nojori jaara janiyajiniji pohuatanu tucutare, jiyacaritij, puequeetuuju raamaji tohuatariquiano pueresano sacuaraatia Casaani, cunoori nojori paracaaniutianiya. Nojori shocotanutaniyari. Naacujitij, nojori puecoonutaniya socuaari. ⁸Nojori queteeri cuno puereetuca niishishano tiaca nuucujajinia pojoconutaniya, tee nojori Jiyaniijia mosaaquaaari niyacutesa-nojinia teetesanocujani. Cuno tiacaari miriqui jiyaniquishiya Sodomata, Egiptotanio. ⁹Naacujitij, jiuujianaraca juuca, socua niquiriyatu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiqiuyocua tiacajinijinio pueya, tamaatiuucua rupaaca pocujaca pueyajuhuj, queraatia tamonu jiyacajinijinio pueyanio. Nojori paraari maja na shanacunu quiniutianiya nojori jamojosaanura. ¹⁰Puetunu mijiria quiniaajanaari shuquiritiutianiya, macunucua cuno caapiqui Pueyaso sequesano caminiujiunaa quishacari. Pueyari jiyanhua timiquionutaniya, naquiya nojori miitiajaca puecoosaanucua. Naaratej, mijiria quijiacaari tama na casamijinijiaaja nareja niquitiojotoonutianiya nojori shuquiriniutia.

¹¹Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitianiiorohua. iNojoriiri na matusaqui saneecuaturohua! Puetunu nojori niquiniaajanaari jiyanhua shiriqitiuri. ¹²Jiyacaritij,

cuno caapiqui Jesucristojiniji pohuata-naari puereetuca rupaa tojitiuri jiyocuacaanuji pocuaano. Naa nojori sequeriquiaari:

—iMiji nia tacatama!

iJiyacaritij, nojoriiri na paraa niquiara tacataquee cohujajinia jiyocuacaanura!

¹³Na paraa shootiasacari nojori, jiyacaritij, rijiaari jiyanhua jiuuquijutiaree. Naa rijia jiuuquitiuasacaritij, Jerusalén tiacajinia queraatia tiacaari niyarequeta-quee. Siete mil pueyari tii cusonuuree. Cureeno pueyari jiyanhua jiuujiateree Pueyasocujaji. Nojoriiri jiyacari niishirii Jiyocuacaanu Quijiaari seetanujanaa Pueyaso cutara.

¹⁴Janiyari naa segundo naquiya miiniu niquitishaareejaaniuhuj, taa na nuhuaji na miishaanutaniyacuajani. Tercero naquiya miishacariiri quera ritia cuno nuhuajijia quiniutianiya.

Séptimo trompeta jonenesacari

¹⁵Séptimo Pueyaso seruuri na trompeta joneneree. Jiyacaritij, puereetuca rupaacaari jiyocuacaanu tojishaaree. Naa sequeturiquiaari:

—iQuiarijiani, pa Jiyaniijia Pueyasoori tari jiitianutaniya puetunu jiyacua jiyaniijianucua jiitiasanojuanaa! iNojuajaari pa Jiyaniijia Cristota Jiyaniijianucua-janaa quiniutianiya! iNojoricuajaari pueyaracaanu Jiyaniijiajanaa quiriqiano!

¹⁶Jiyacaritij, cuno veinticuatro niishijia jiyaniijianucua, shanhua cajitijjia cajituriqiaa Pueyaso tacobini, nojoriiri Pueyasocuaara jacamaturee jiyanhua na shuqiritianuta nojuaja. ¹⁷Naa sequeturee Pueyasoori:

—iPaacarasho canaa Jiyaniijianaa! iQuiaari puetunu cumaacaracajanaa! iQuiaari quijiajuhanajaj! iQuiaari pueyaracaanu quijia!

iQuiaari tari juhuacatecara quia cumaaca poonijioteree, Jiyaniijia-janaa quia quiniuria pueyaracaanu! ¹⁸Cunora, puetunu jiyacua jiyaniijianucujanaari juaaquioya. Naajaa, quiarijiaari quia juaashacari cutara. Quiarijiaari macunucua quia nequesoreenu juucajuhuaj. Saniniuujia, quiaari pueyara quia sequesano caminiujiunia pueya niquitiojonutaniya nojoririano quia riuriotaca, puetunu quia saquiriojosano pueyajanaajuhuj, puetunu quia timitajaca pueyajanaanio, jiyaniijianucua, narejaca pueyanio. Naajuhuj, quiaari jiya sesojucua pueya shaajanutaniya.

¹⁹Jiyacarijiuhuj, jiyocuaaanu Pueyaso Secojoua tiaari riatasaaree. Janiyari Pueyaso Quishaquijianaa niquiriini. Tii matariquiaari Pueyaso caaja, seetanujuaana na Rupaajanaa na racataja. Cuno na Rupaari na pueya na jiyanoottaja, na tojiyashijiaca na saniitotajajuhuj. Jiyacaritij, miacanaari nunujuree. iJiyanoehua majacureeri! iPuereetatej, jiyanoehua cojuata! iRijiaari jiyacari jiuuquiutiaaree! iJiyanoehua queraatia miacanajaa shiniituijiaacaari juhua maru totreejuhuaj! iJiyanoehua puereetaari quiriquiaa!

**Miriqui pohuatasano maajijiniji,
puereetuca Naaquerujinijijuhuj, juhua
cohuaniquia niquishano**

12 ¹Na nuhuaji, pueya jiuuujiatenura, casaari jiya cajiniocua niquishaa-ree. Maajiiri quiriquiaa cuno, cua niquishanoni. Juhua toqueta pananujinia cuhuaajaatariquiaari. Racaacua nujuariquiaari. Doce riyari na nacaque quiriquiaa. ²Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu

panishacari. ³Jiyacaritij, janiyari socua tamonu casaa niquitishaaree jiya cajiniocuaani. iPuereetuca Naaqueruuri quiriquiaa, naatuhuaana! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaa-racanio. Jiyaniijianucua shipinijosano nacaqueya niquitiacoriquiaari na siete nacacaacua. ⁴Cuno naatuhuaana Naaqueruuri quera na cajiniocua riyajinijinio nocuara rerecoree jiyocuaaanuji na pitiutia. Nio jiyocua na jacutareeri. Naaqueruuri rariquiano maaji tacoji shanacuriquiaa. iNa sashiriquiaari cuaara raara, mueya na mianura jaara rasaare! ⁵Maajiiri cayaniyojua raree. Nojuajaari puetunu mijiria quijiaa pueyapuejanaa Jiyaniijiajanaa quiriquiano. Nojuajaari pueyaracaanu na maca mueturiquiano, na tojiyashijiaca na piyotajara. Mueyari na nucua jaariutiasaaree Naaqueruucua. Pueyasoori na shuriucua na ririi, tii na cajitiniuria, Jiyaniijia quiriquianoni. ⁶Maajiiri saniniuujia cariquia jiyajinia mashirii, tee Pueyaso jeenucuaquiaari tari nocuaji na quijiaracuajani, tii na mianuutesaanurajuhuj, cuaara shocojorejaatijia mil dosciento sesenta juuca.

⁷Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuaana Naaquerujuhuj puetunu na seyatajanaa. Puetunu nojorijianaari puereeta quiaquetooriaquia jiyocuaaanu. Cuno Naaqueruuri na seyata jiyanoehua quiaqueriquiaa Pueyaso seya juucua. ⁸Naajaa, majaari nojori naata quiriquiaa Pueyaso seya shocotanu. Pueyaso seya paracaaniucua jiyanoehua nojori, majaari quiquio quiniu quiriquiaa socua nojoriria jiyocuaaanu. ⁹Naacuajitij, cuno Naaqueruuri jiyocuaaanuji taanuusaaree. Nojuacajaari cuno tariucuaaanu Soconu*, Eva sapojoquiaarini. Cuno Sesaaca seque sesaari “Satanás”. Nojuajaari puetunu mijiria

quiniiajanana sapojoquiaa. Pueyaso seya shocotanuucua nojuaja, nojuajaari puetunu na seyatajanana nio jiyacua quejoosaaree.

¹⁰Jiyacaritij, janiyari jiyocuacaanu quijiaca queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa sequeturiquiaari:

—iPueyasoori parta Pueyaso pueyacuara Saquiriojotana jataree tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jatasaanuucuatej, Pueyasoori quiarijia tohuateenutaniya puetunu na sequesanojuanaa na jiyanooshano pueyara. iNojuajaari maninia jiitianutaniya pajaniya, jiyanoehua na cumaacata! iPaa Jiyaniijia Cristoori tari jiyatesaaree Jiyaniijiajanana na quiniuria! Naa na miishaanuni, cunoori na Que saquiriojosano na quiniuucua.

¹¹iPueyaso Borrego na quiniuucua, nojuajaari na nanaca shootequiaari, tojetaarucujanaa jiyanooshano pa quiniuria sesa pa miishanojiniji! Naacuajitij, Satanás saquiriojotascari parta Pueyaso pueyacuara, nojoriiri na sanaajaquiaari nojori tiuuniuucua Jesucristoocua. Nojoriiri na shocotaquiaarijianaa, nojori pohuatanuucua Jesucristoocua nojori tiuuniujiniji. Nojoriiri maja na puerenu quijia na mosaanura. Nojoriiri seetanujanaa juhuajaniya tama na cuaqueyajaapanitiaquiaari nojori mosaanura. ¹²iNaaratej, jiyocuacaanunaa, shuquiriaatia quia quiri! iNaa Sesaaca jatasaanuucuatej, nia timiquiore jiyocuacaanu quijiacanaa! iNiajaniya saniniuujia, jiyacua quijiacanaa, shoniniacu

caminiainia quijiacanio, jiyanoehua nia taraajere! iSesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari niaacua roseyarucuaa jiyanoehua na juaaniutia!

¹³Cuno puereeta niquishano Naaqueru niishishacari nojuaja tari jatasaaaree jiyocua, nojuajaari cuno mueya nucua neteyojotanu coteeree na mianura juucua. ¹⁴Cuno maajiiri querajaa puereetuuca nesu niqutiosaaree saaja, juhua jiyanoehua puereetuuca surohua miooru nesu. Cuno nesuta, maajiiri na quiquiojiniaara jaaree cariquia jiyajinia, tucuaaanu cuno Naaqueruucua. Tii mianuutesaanutaniya pueyaracaanuuri cuaara na shocorejaatijia jiuujianaraca marijia, socua seis racanio. ¹⁵Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. ¹⁶Jiyari maaji naacutaree. Jiyari juhua na rupaa riataree. Naaqueru rupaamaji pojuaretaano moo raturee saajaari. ¹⁷Naaqueruuri jiyamitia maajiicua macaarii jiyanoehua. Quiaareeri maajiicuaajinio supueno pueyata miaquetojonura. Cuno pojoricuajaari Pueyaso rootasano tojitiajaca, canapuee Jesucristoocua nojori tiuuniu seetaashijiacuajani.

¹⁸Naaqueruuri shoniniacu caminia casaqueyaji nujuasee.

Caapiqui puereeta niquishano Casaajiniji pohuatasano

13 ¹Na nuhuaji, janiyari puereeta niquishano Casaa niquirii shoniniacu caminiainijini tacaanonni. Siete nacacaraca quiriquiaari, diez nacajaacanio. Puetunu na diez nacajaacua jiitariquiaa jiyaniijianuucara shipinijosano nacaqueyari. Puetunu na nacacaacujanaa, sesacaari nocua naajiotasano quiriquiaa. Na nacacaacua

naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniuucua. ²Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na niohuacaari juhua oso* niohuaca niquishano quiriquiaa, tucuacocua juaashococuaraca. Na rupaari juhua juurunu sare rupaa quiriquiaajuhuj. Cuno tari cua pohuata-sano naatuhuana juhua cohuaniquia niquishano Naaqueruuri na cumaaca na niquitioree. Tama na cajituijiniajaaja na cajitiriiri jiyaniijiajanaa na quiniuria jiyacua. ³Cuno puereeta niquishano Casaa siete nacacaracani, niquiriyatu na nacacajinijiniori pishano quiriquiaa na mosaanura juucua. iCuno puereetuua piyashi na nacaacua quiriquiaani, saaja cushiriiquiri! Puetunu mijiria quiniaa pueyajanaari jiuujiateree na cushiriishacariuhua. Cunora, puetunu nojorijianaari cuno puereeta Casaa tojjiiacara quirii. ⁴Jiyacaritij, mijiria quiniaa pueyari cuno naatuhuana Naaqueruucuaa jacamaturee juhua Pueyasooocua, cuno puereeta niquishano Casaa na jiyatenuucua nojori jiyaniijiajanaa na quiniuria. Pueyari cuno siete nacacaraca puereeta niquishano Casaacuaa jacamatureejuhuj. Nojoriiri naa sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetojonura? Shaaqui.

⁵Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaratia na rimiaaquenura Pueyasooocua, Pueyaso na rerequetenurajuhuj. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jiyaniijiaa jiyatesaaree saaja cuarenta y dos racara. ⁶Naacuajitij, cuno puereeta niquishano Casaari Pueyaso

rerequetenu coteeree. Pueyasooocuaa rimiaaquereeri. Jesuucua tiuujiaa pueya sesacareejaariuhuj, jiyocuaaanu Pueyaso quiquionio. ⁷Mijiria quijiaa Pueyaso saquirojosano pueya paracaati-shaareejaariuhuj.

Cumaquishaareejaariuhuj Pueyaso pueya na shocotanura. Cumaaca niquiti-saareejaariuhuj jiyaniijiajanaa na quiniuria, puetunu tamaatiuucua pueyapuejanaa na jiitianura, puetunu tiqiyocua tiacajinijinio pueyajanaa, puetunu tamaatia rupaaca pocuajaca pueyajuhuj, puetunu tamonu jiyacajiniajanaa quijiacanio. ⁸Naacuajitij, puetunu mijiria quijiaa pueyajanaari cuno puereeta niquishano Casaacuaa jacamaturee na shuquiritianura nojuaja, nojori pueyaso na quiniuucua. Cuno pojoriiri maja Pueyaso saquirojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jiitiasano naajioneenija, cante pocuara mosaaquiaaricuajani. Pueyaso muerasu sesaca cutaraari cuno naajioneenija naajiotasaaquiaari jiya shipinishaacarijiojua, pueyaracaanu rishijiaa pa quiniuria.

⁹Cante numaaracani, nojuaja cuaara tojiiria nio: ¹⁰“Cante Pueyaso jiyatesano quiasocoriquianoni, nojuajaari seetanujanaa quiasano pueyano quiniutianiya. Naajuhuj, cante nijiniaquetucuaa mueruuta mosocoriquianoni, seetanujanaa naa mosaanutaniyari”. Naaratej, Pueyaso pueya cuaara puetunu casaajanaa rejeretajaca quiriia, seetanujanaa nojori tiuushacari Pueyasooocua.

¹¹Na nuhuaji, janiyari tamonu puereeta niquishano Casaa niquirri jiyajiniji muetaanoni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari.

¹²Jiyanohua cumaacaraca quiriquiaari, juhua narta puereeta niquishano Casaa, teyano naca pishanotucuaaja cushiriiriohuani. Nojuajaari na naca cushiriiniohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojqetani-jioree juhua Pueyasooacara, nojori timitianura na naca pishano cushiriiniohua puereeta niquishano Casaa.

¹³Naajuhuaaj, nojuajaari na cumaacata miiri jiyajeneta casaa pueya jiuujiatenura nocuaji. Jiyanohua cumaacaraca na quiniuucua, pueya niquiaari, nojuajaari mani tinirii jiyocuacaanuji jiyocua. ¹⁴Naa na cumaacata na miiniuucua cuno na naca cushiriiniohua puereeta niquishano Casaa tajoitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaari quiriquiaa, teyanote na nacajinia mueruuta pishano na quishacari samitiarohua saajacuajani. ¹⁵Jiyacaritij, nojuajaari cumaaca niquitiosaaree pueya shipinishano Casaa na jiyatenura saminiara, pocuajara na quiniuria, nocuara jacamatuyashijiaca na puecootenurajuhuaaj. ¹⁶Naajuhuaaj, cuno caapiqui nacajaraca puereeta niquishano Casaari na pueya sequeree nojori naajiotanura puetunu pueyacujanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaa-re, nojori jiniji naajiotasaareeri. Naacuajitij, puetunu mijiria quiniaa pueyacujanaa naa naajiotasaareeri, tojiyaquishoo pueyacua, tojishano pueyacua, casamiriaca pueyacua, casamijiuniucua pueyacua, tama nojoriria poonijionuujucajaaja pueyacujuhuaaj, poonijiotasano pueyacuanio. ¹⁷Jiyacaritij, canapute cuno puereeta niquishano Casaa sesa

naajiotasano jiitiaaquiriquiaa na cuaqueyacuani, nojoriiri maja na naata na panishano masenu quiriquiaa na cumaneecata. Naajuhuaaj, majaari nojori naata na casami niquitiojonu quiriquiaa na cumaneecata. Pueya jaara cuno puereeta niquishano Casaa sesa jiitiaaquiri naajiotasano na cuaqueyacua, na naata na sesa número* jiitianu nocua naajiotasano.

¹⁸Nio niishishaanura maninia, jiyanohua niishitajaari panishiya cutara. Niishijiaca pueya cuaara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. iCunora pueyanaa, tama nia cuaqueyajaja nia cojuare maja cuno puereeta niquishano Casaa sesa naajiotasaanura niaacuajuhuaaj!

Borrego Niquiojua cojiniaajiniji pohuatasano

14 ¹Na nuhuaji, janiyari Borrego Niquiojua niquiriini, Sión tuhuanuucua nujuaano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhuaaj. ²Na nuhuaji, janiyari casaa tojirii juhua sararojua cojuatuneyano jiyocuacaanujini, juhua miacana majacuyano, juhua queraatia pueya arpa taquinionuanojuhuaj. ³Cua tojishanoori quiarinio jaaquequejosano quiriquiaa. Jaaquequenuunaari Pueyaso cajitiu tajoji jaaquequenuuriquiaa, cuno cuatro saminio casaa tajojijuhuaaj, cuno veinticuatro niishijiaca jiyaniijianucua tajojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhuaaj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria

quiniaajinjinio saquiriojosaaquiaari Pueyaso pueya nojori quiniuria. ⁴Nojoriiri tojetaarucujajanaa maaji numuetuqueyashijiaca quiquiaari, saaja pocuaji Tacunaacua jiaatijaca nojori quiniuucua. Naaratej, tiqiyocua Borrego Niquiojua rucuanijosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinjinio, saaja Pueyasora nojori quiniuria, Borrego Niquiojuara nojori quiniuriajuhuaj. Nojoriiri socua Pueyaso timitiasano pueya puetunu Pueyaso saquiriojosano pueyajinjiniojuanaa, taa pa shuquiritiaa shushajanaa pa carojosano pa nataujinijicuaani. ⁵Nojoriiri tojetaarucujajanaa sapojonu niishiyashijiaca quiquiaari, tojetaarucujajanaa sesa miyashijiaca nojori quiniuucua.

Jiuujianaraca Pueyaso seya pohuatasano

⁶Na nuhuaji, janiyari tamonu Pueyaso seru niquiriri jiya cajiniocua jaanoni. Jaariquiaari mijiria quijiaa pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapuerajanaa, puetunu tamaatia rupaaca pocuajaca pueyarajanaajuhuj, puetunu tiqiyocua tiacajinia quijiaa pueyarajanaanio. Na pohuatasanoori seetanu rupaaajanaa pueyaracaanura. ⁷Pueyaso seruuri mijiria quiniaa pueyacua nacariquiaa naatej:

—iPueyaso puerejaca nia quiriquia! iNojuaja nia maniniuhuaqueetare! iQuiarijiaari na nequesoreesacari pueya! iNocua nia mojuquetacore nia shuquiritanura nojuaja! iNojuacuaajari jiyocuaaanu shipininia, nio jiya, puereetuca shoniniacu caminiajuhuaj, puetunu samocua nacaca pacartacojuacajanaanio!

⁸Jiyacaritij, tamonu Pueyaso seruuri narta Pueyaso seru nuhuajimiaajuhuj.

Naa miriqui sequeriquiaa Roma tiacajiniijiiri:

—iBabilonia* tiaca tari saniitioshiya! iCuno puereetuca tiaca tari saniitioshiya! Babilonia tiacaari puetunu jiyacajinia pueyajanaa niishitiojojua, sacaraatia nojori miiniuria juhua nojuajuhuj. Babilonia tiacani, nojuajaari puetunu sesa casaa na miiijosanotajanaa juhua mashaasequetejoquiaari puetunu mijiria quijiacajanaa. Naacujitij, puetunu pueyajanaari tama na cuaqueya miiniu panishanojuaja miijiacara quiquiaari, jiyanhua nojori jiaatianuta sacaraatia casaa na miiniuria, taa Babilonia tiacajinia quiniaa miiioquiaacuaani.

⁹Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhuj. Mijiria quiniaa pueyacua nacaree naari:

—iJiyanhua puereeta quiniutianiyari noo pojoriria, canapute cuno puereeta niquishano na naca pishano cushiriiniohua Casaacua mojuquetacojua juhua Pueyasooocarani! iJiyanhua puereeta quiniutianiyari noo pojoririjuhuj, canapute juhua na naca cushiriiniohua niquishano shipinishano Casaacua jacamatujacani! iNaajuhuj, puereeta quiniutianiyari noo pojoriria, canapute na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj! ¹⁰iPueyasoori puetunu cuno pueyajanaa saniitionutaniya jiyanhua na juaaniutia! iMajaari quenaaja Pueyaso jiuujiaaniu quiniutianiya nojori! iPueyaso seya niquiara, Borrego Niquiojua niquiarajuhuj, nojoriiri pueyaracaanu naquiya miishaanutaniya manitia, azufretanio! ¹¹iNaa Pueyaso miitiasacari nojoritij, najacaari pueyaracaanu nojonutaniya! iMajaari quenaaja nojori samaraatasaanu quiniutianiya juuca, niucuanio! iNaquiya

miiniuuri naa nojori miitianutaniya pueyaracaanu! iNaa miishaanutaniyari cuno pojori, canapuede na naca pishano cushiriinohua puereeta niquishano Casaacuara jacamatujuaca juhua Pueyasooouarani, juhua nojuaja niquishano shipinishano Casaacuarajuhua! iNaa miishaanutaniyajaariuhua noo pojori, canapuede cuno puereeta niquishano Casaa sesa naajiotaniniutianiya tama nocuajaajani!

¹²Cunora, Pueyaso saquiriojosano pueyani, canapuede na rootasano tojitiajacani, Jesuucua tiuuniu tarinitiaa-shijiacajuhua, nojori cuaara juhuaianiya rejeretaara naquiya nojori miishacari.

¹³Jiyacaritij, janiyari rupaa tojirii jiyocuacaanu naa cua sequeyanoni:

—Nio quia naajiotare: “iQuiarijiani, jiyanoehua shuquiriaatia quijiaa cutaraari cuno macunucua, canapuede tariucua Jiyaniiija Jesucristoocua tiuujiaca cusoonunutaniyani!” Pueyaso Sohuanuuri naa sequeyajuhua: “iTaaquiriirini! Nojoriiri samaateya, pueyaracaanu na Jiyaniijiara na poonijionuunu nuhuaji. Maninia nojori miishanocuaajari niyajetaaquishaanutaniya. Cunora, nojoriiri maninia miishaanutaniya”.

Pueyaso seya senoosacari pueya juhua nataacuaca nio jiyajiniji

¹⁴Na nuhuaji, janiyari cohuaja najaca niquiriini. Cuno cohuaja najaca caco cajiniiaari juhua Pueyaso Niyanu niquishano quiriquiaa. Jiyaniijiara shipinishano nacaque cushitariquiaari, orojiniji shipinishano. Nataacuaca na senootajara shamatucaja jacatunee mueruu mueturiquiaari. ¹⁵Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajiyanoocua nacaree jiyanohuari. Naa na sequereeri:

—iQuia mueruuta quia canuujure, nataacuaca quia senoonura! iJiyajinia

nataacuacacuaajari tari noshuriujua! iCuaara quiarijia senoosaaria!

¹⁶Jiyacaritij, cohuaja najaca caco cajiyanoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuacaanu.

¹⁷Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamatucaja jacatunee mueruu mueturiquiaajuhua. ¹⁸Na nuhuaji, socua tamonu Pueyaso seruuri tohuatamaa Pueyasooouara catijiaja casaajiniji. Nojuajaari mani camaru. Nojuajaari narta Pueyaso seruucua nacaree, shamatucaja mueruu muetuyanoooua. Na sequereeri:

—iQuia shamatucaja mueruuta uva quia carojotare, jiyajinia moritiaconuni! iTari noshuriujuacuaja!

¹⁹Jiyacaritij, Pueyaso seruuri uva carojotare na mueruuta, puetunu nio jiyajinia cuhuariquiaajinijianaa. Uva jaapuejoree saajiajinia quejasano puereetuca surocohuamaari. Pueyasoori tii na rapijiotenutaniya jiyanoehua na juaaniutia. Cuno uvani, nojoriiri Pueyaso ruuretajaca pueyacuaja. ²⁰Cuno uvaari rapijiosaaree tucuaacaanu naata tiacajiniji. Uva rapijiosaquiji, nanacaa tojetaarucujanaa jaateriquiaa juhua mohuaca. Jiyanoehua nanaca quiniucua, cabollohua rupaacuma puecariquiaari. Pueyaso tojiyashijiaca pueya nanacaari jiyanoehua tucuaacaanu jaateree juhua moo. Tresciento kilómetro* jaatereeri.

Siete Pueyaso seya, siete naquiya miitiaja na mueetacosacari

15 ¹Na nuhuaji, janiyari jiya cajiniocua socua niquitishaareeni, cua niishiniuria taa mijiria quiniaa saniitiosaanu tucuatasaanutaniyani. Cua niquishanoori jiyanoehua puereeta

quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miititaja mueetacotriquiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujuanaa.

²Janiyari casaa niquirijiaaniuhuj juhua puereetuca caminia motiuiquojini ji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacuaja, canapuate na naca pishano cushiriinohua Casaa shocota-quiaaricujani, juhua nojuaja niquishano shipinishano Casaajuhuj. Naajuhuj, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niquitiojosano arpaa taquinio-nuuriquiaa. ³Nojoriiri Pueyaso seru Moisés jaaquequejosano jaaquequenuuriquiaa, Borrego Niquiojua jaaquequejosanonio. Nojoriiri naa jaaquequenuuriquiaa:

—Jiyaniijianaa, puetunu quia miishanojuanaari jiyanoehua maninia, nocuaji jiuujiatasano. iQuiaari seetanujuanaa puetunu cumaacaracajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quijiaa pueya Jiyaniijiajanaa. ⁴iQuiaari pueresano, Jiyaniijianaa! iQuiaari tojetaarucujanaa maniniuhua-queetasano seetanujuanaa! iSaaja quiajaniya cutaraari tojetaarucujanaa maninia mijia pueyaracaanu! Naaratej, puetunu jiyacajinijinio pueyajanaari quiocua nijionutaniya nojori shuquiritia-nura quiajaniya, maninia quia saniitiojonuucua quia paraajuhuj.

⁵Naa cua tojinu nuhuajitij, janiyari jiyocuaaanu Pueyaso Quishaquijianaa niquirii riateyanoni, tee cuniqui seetanu

Pueyaso rupaaajanaa racatasano quiyacua-jani. ⁶Cua niquishacari, cuno siete Pueyaso seyari Pueyaso Quishaquijianaa tohuareetariquiaa, canapuate cuno siete naquiya miititaja patootariquiaacuajani. Nojoriiri tojetaarucujanaa cohujaja linojiniji* toqueyaraca quiriquiaa, shacantuqueya. Nojoriiri orojiniji shipinijosano casaa na jiriquiacajinia camarucuteriquiaa. ⁷Jiyacaritij, niquiriyatu cuno cuatro saminio casaajinijinioori miacojua niquitiojoree puetunu cuno siete Pueyaso seyajanaa. Cuno miacojuuari orojiniji shipinijosano quiriquiaa. Pueyaracaanu rishijia Pueyaso juaaquiacaata mishinijosano quiriquiaari. ⁸Jiyacaritij, Pueyaso Quishaquijianaari maatia najacata mishiquimaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuaara puecaarajaatijia naquiya nojori miitijaca pueya. Cuno najacaari Pueyaso shacantuca cumaacajiniji quiriquiaa, naa na saniitiojosacari na paraa.

Saniitionujiniji pohuatasano

16 ¹Jiyacaritij, janiyari tamonu rupaa tojirii Pueyaso Quishaquiji nacaanonio. Naa cuno siete Pueyaso seya sequereeri:

—iNia siete miacojuajiniji Pueyaso juaaquiaca nia taroossee jiyocua!

²Niquiriyatu Pueyaso seruuri juhuacate-cara coteeree. Quiaareeri. Na miacojuajiniji jaapuesee jiyocuaari. Jiyacaritij, jiyanoehua nootuca sapueyari pueyacua supueeree. Noo pueyacua supueereeri, canapuate nocua naajiotasano jiitariquiaa na naca pishano cushiriinohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaaju-huj. Jiyanoehua nootujuaaca sapueyari quiriquiaa.

³Segundo Pueyaso seruuri na miacojuajiniji Pueyaso juaaquiaca jaapuesee puereetuca shoniniacu caminiyajinia. Mohuacaari puetunu nanacara quiquijia-naa, juhua shusha mosano pueyano nanaca. Cunora, puetunu shoniniacu caminiyajinia quijia casaajanaari cusonuuree.

⁴Tercero Pueyaso seruuri miacojuajiniji Pueyaso juaaquiaca jaapuesee puetunu moocuajinijanaa, puetunu samocua nacaca pacartacojuacajinijanaano. Jiyacaritij, nanacara jataquee puetunu-juaanaari. ⁵Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhuana-jaj. Majaari quia supuenu quiquiaari. Quiaari tojetaarucua-janaa maninia. Naa quia miitiasacari quia tojitiaashijiatej, quiaari seetanujanaa maninia namirii nojori. ⁶Nojoricuajiaari quia saquiriojosano pueyajinijinio nanaca shootejoquiaari pueyara-caanu, quia sequesano caminiujiunaa nanacanio. Quiari-jia saniniujia, naa mijiaca nojori quiniuucatej, quiaari nojori raatejoree nanaca. iManiniacuaja Jiyaniijianaa!

⁷Jiyacaritij, janiyari Pueyasoocuaa catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijianaa, puetunu cumaacaracajanaa Pueyasonaa. Quiaacua-jaari maninia saniitioree quia tojiyashijiaa, taa quia sequequiaari tariucuacaanu nojoricuajani, quiaari quia tojiyashijiaa saniitionutaniya. Quiaari seetanujanaa sequequiaari quia miishocoriquiano. Quiaari puetunu sesa nojori miishanojuanaa niishijia.

⁸Na nuhuaji, cuarto Pueyaso seruuri miacojuajiniji Pueyaso juaaquiaca

jaapuesee pananuucua. Naacuaajitij, pananuuri socua jiyanoehua naseecara quiquii, pueya na catijianura juhua mani. ⁹Naa pananu januucua jiyanoehua nasaatiateg, pueyari jiyanoehua catere. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucatej. Majaari quenaaja nojori pishiniu quirii sesa nojori miiniujiniji, nojori tacatonuhuaa noojia Pueyasocua, nojori jiyaniijiaara nojori jiyatenura Pueyaso. Pueyaso rerequeteturee saajaari.

¹⁰Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriinio-hua puereeta niquishano Casaa cajishaqui na jaapueseeri, tee cuniqui juhua jiyaniijijanaa na cajiriquiaacuajani. iJiyacaritij, puetunu na jiitiasano jiyacajanaari ninishiquiria quiquii! Cunora, na pueyari na niti saaquioriquiaa jiyanoehua nooeta naquiya na miiquiosacari. ¹¹Naa Pueyaso saniitosacari nojoritij, naajaa, majaari nojori pishiniu quiriquiaa sesa nojori miiniujiniji. Nojori nootunenuucua, nojoriiri jiyocuacaanu quijia Pueyaso sesacaree saaja, nootujuaaca sapueyaraca nojori quiniuucujuhua.

¹²Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetuca Eufates moojinia. Moori jojequetaquee jiya pajamaji niriqiano jiyaniijianucua niuutijara.

¹³Jiyacarijuhuaj, janiyari jiuujianaraca samaruhua niquiriini, juhua sacarohua niquishano. Cuno samaruhuari tohareetariquiaa juhua cohuaniquia niquishano naatuhuaa Naaqueru rupaamaji. Tohareetariquiaajariuhua na naca pishano cushiriiniohua puereeta niquishano Casaa rupaamaji, narta puereeta niquishano Casaa rupaaminio.

Cuno puereeta niquishano Casaari mijiria quiniaa pueya sapojoriquiaacujaja, nojori tojiniuria na naca pishano cushiriinohua puereeta niquishano Casaa. ¹⁴Cuno jiuujianaraca samaruhuari cumaacaraca quiriquiaa, na cumaacata nojori miiniuria nocuaji jiuujiatesano casaa, pueya tiuuniuria nojori sequesanoocua. Nojorii-ri naa miiriquiaatej, puetunu mijiria jiyaniijianucujajanaa nojori rerejotenura. Jiyaniijianucuaari naa rerejotesaaree nojori miaquetojonura puetunu cumaacaracajanaa quijia Pueyasota. Pueyasocujajari tariucuacaanu niishirio-joquiaari naa cuno juuca na miaquetojonura nojoritia. Naa paniquiaaricujajari na paraa na puecoo-nura.

¹⁵Jiyacaritij, janiyari pa Jiyaniijiajanaa tojirii naa sequeyanoni:

—Cua tojitiare cua pueyanaa. Janiyari canashiaquiji tiuqiniutianiuhuanu nia niishiaquishacari. Janiyari naa niaacua tiuqiniutianiuhuanu taa nohuasejojua tiuquiquiaa casami nohuasenuucucuaa-ni, juhuajaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secojosaca-ri, na sashishacari janiya. Tojetaarucujajanaa sesa miyaquijia nia quiri, niaa mariqui cua tiuquishacariuhua cararaatia juhua juhuasunucua quiri cua niquiaaraari.

¹⁶Cua Jiyaniijia sequesano cua tojinu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupajinia, nojori rerejosaqui sesaari, “Armagedón”.

¹⁷Séptimo Pueyaso seruuri miacojuajini Jiyacaritij, jiyocuaacaanu Pueyaso Quishaquijianaa Jiyaniijia cajitijuniji, janiyari rupaa tojirii naa nacaanoni:

—iTari miishaaree puetunujanaacua-ja!

¹⁸Jiyacaritij, miacanaari nunujuree. iJyanohua majacureeri! Cojuataari quiriquiaa puereeta. Rijiaari tojetaaru-cujajanaa jyanohua jiuuquiujiutiaree. Pueyano shipinishaanujiniji, majaari naa rijia jiuuquiujiutianu quijia juhua nio rijia. ¹⁹iNaa rijia jiuuquiujiutianuucua jyanohuatej, cuno puereetuca tiacaari neequeresetaquee! Jiuujianaracara raquitijiquiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetuca Babilonia tiaca saniitioree, taa tariucuacaanu na niishiriojoquiaari cuno juuca na saniitio-nuracujani. iJyanohua na juaaniutia na saniitioreeri! Niya sequeshiya Babilonia tiacatani, cunoori Roma tiacacujaja.

²⁰Jiyacarijuhuaj, puetunu shoniniacu caminiajinia jiya tucuaatiajacajanaari shaajequee, puetunu tuhuananuhujajanaa-nio. ²¹Naajuhuj, jiyocuaacaanu ji jyanohua puereetujuaca miacanajaa shiniitijiaacaari toteree pueyacia. iNoojiaqueyari jyanohua niiquia quiriquiaa; cuarenta kilo! Mijiria quiniaa pueyari Pueyaso sesacaree, naa nojoriicua na totinijianuucua shiniitijiaaca miacanajatej.

Miriqui pohuatasano Roma tiacajiniji, juhua paanatu

17 ¹Na nuhuaji, cucua nimiaari niquiriyatu cuno siete Pueyaso seyajinijinio, canapuede siete miacojua patootariquiaacujani. Cua sequeseeri:

—Miji quia nimia. Janiya quia niquitiniutianiyanu taa Pueyaso saniitio-nutaniya cuno Paanatuni, puetunu jiyajinia mohuacaacujajanaa cajiyani. ²Mijiria jiyaniijianucuaari cuno Maaji numuetucujuuaca. Sacuaraatia cuno Paanatu niishitiojosanota, nojuajaari juhua mashaasequetojojua puetunu

jiyacua quiniaa pueyajanaa. Naacujatij, nojoriiri sacuaraatia mijiacara quiquiaari, juhua nojuajuhua.

³Pueyaso seru niquitiniuria janiya na niquitiniu panishano, nojuajaari cua sohuanu jiyataare cariquia jiyajinia. Janiyari tii niquishii Maajini, naatuhuana puereeta niquishano Casaa nijinia cajiya. Queraatia sesacaari cuno naatuhuana Casaa cuaqueyacia quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaracaari quiriquiaa, diez tuhuajaaracanio. ⁴Cuno Maajiiri shanohua toqueya cushiriquiaa, naatuque, shaarukejuhuaj, juhua jiyaniijianucua cushishano. Queraatia shanohua maniniushitiaja casaa cushitiriquiaari: orojiniji shipinijosano casaa, shanohua saijiniji shipinijosano tiujiaujuhuaj, noturu shipinijosano saijiniji tiujiaunio. Orojiniji shipinishano miacojua mueetariquiaari. Mishaja quiriquiaari puetunu sacuaraatia na mijijosano casaatajanaa, numuetucujusaanu porocua na quiniuucua. ⁵Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanatujuri nucuani, puetunu mijiria sacuaraatia miishanojuanaa coretanijiojua nucuanio”. ⁶Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanhua timijia, Jesujiniji pohuatanaa puecoonu porocua na quiniuucua.

Naa cua niquishacari nojuajatej, janiyari jiyanhua jiuujiatereeni. ⁷Pueyaso seruuri jiyacari cua sequeree:

—¿Casaara quia jiuujiateya nocuajini? Quiarijia quia pohuatareera quia niquishanojiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na nijiniani, puetunu

cunojuanaari miriqui. ⁸Cuno puereeta Casaa quia niquishanoni, cunoori tariucuaacaanujiniji quijia quiquiaari. Quiarijia saniniuujia, majaari tari na quiniu. Naajaa, quera tacanutaniuhua cuno puequeetuaju raamajiiri, seetanujuanaa puetunujuanaa na shaajasaanuhuara cutara. Pueyaso ruuretajaca pueyari jiyanhua shiriquitiniutianiya nojori jaara cuno puereeta niquishano Casaa niquiri tacatehuano, teyanote tariucuaacaanu quijia quiquiaari-cuajani, quiarijia saniniuujia majaari na quiniu. Jiya shipiniyaquishacarija, cuno pueya sesacacujaari Pueyaso saquiriojosa-no pueya sesaca naajiotasaqui naajiotasoo quiquiaari.

⁹Cante niishijiani, nojuaja cuaara niishiiria cua pohuatasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhuananuhua, teyanoooca cuno Paanatu cajiycuajani. ¹⁰Cuno siete jiyaniijianucuaajinijinioni, cinco nojorijinijiniori tari shaajasaa-quiaari. Cuno caapiqui cureenojinijini, niquiriyatuuri jiyaniijia quia quiarijia. Tamonuuri supueyojua. Nojuaja jaara supuere, saaja rupaquijia rishiniutianiyari jiyaniijia na quishacari. ¹¹Cuno puereeta niquishano Casaa, teyanote tariucuaacaanu quijia quiquiaaricuajani, nojuajaari cuno cinco shaajasano jiyaniijianucuaajinijio quiquiaaricuaja. Majaari quiarijia na quiniu. Na nuhuaji supuenutaniuhuaro octavo jiyaniijia na quiniuria rupaquijia. Na nuhuaji shaajasaanutaniya cutaraari.

¹²Cuno diez nacajaa quia niquishanojaniuhua, cunoori diez jiyaniijianucuaranocuja. Nojoriiri cumaaca niquitiosaanutaniya saaja niquiriyatu hora jiyaniijianucua nojori quiniuria cuno puereeta niquishano Casaata. ¹³Cuno diez jiyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaaca-

tajanaa, jiyaniijiajanaa cuno puereeta niquishano Casaa quiniuria. ¹⁴Nojoriiri Borrego Niquiojuata miaquetojonutaniya. Borrego Niquiojuuari nojori shocotanutaniya saaja, seetanujuanaa Jiyaniijiajanaa na quiniucua. iNojuajaari puetunu jiyaniijia-nucujanaa Jiyaniijia! Nata quiniaa pueyari Pueyaso saquiriojosano pueya, Neyanu tojtijacatuhuj.

¹⁵Pueyaso seruuri socua cua sequeree: —Quiaacuajaari cuno Paanatu niquirii puetunu mohuacacuajanaa cajiyo. Cuno mohuacacuajaari queraatia tiaca, tamaatiuucua pueyapue, tamaatia rupaa pocuajacajuhuj, tamaatia jiyacajinia quijiaca pueyano. ¹⁶Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niquiniu paniyaquiniutianiya tojetaarucua-janaa. Na cartetunutaniyari. Tojetaarucujanaa juhuasu na tiujiatunutan- niyari. Nojoriiri cuno Paanatu miiaquenutaniya. Na nuhuaji, na nucuhua catijiatunutananiyari. ¹⁷Pueyasojuanaacuajaa- ri cuno Paanatu paraa niishitiniutianiya naa nojori miiniuria cuno Paanatutej, taa Pueyaso paniya na miishaanuracuajani. Naajuhuj, Pueyasoori cuno diez jiyaniijia- nucua niishiriojotenutaniya jatiqiu. Naacuajitij, cuno jiyaniijianucuaari roojotoonutaniya nojori cuaara cumaquiria cuno puereeta niquishano Casaa puetunu nojori cumaacatajanaa. Naacuajitij, Pueyaso panishanoori tohuatesaanutaniya taa na sequequiaaricuajani. ¹⁸Naajuhuj, cuno Paanatu quia niquishanoni, nojuajaari cuno pueretuuca Roma tiacacuaja, miriqui sequeshiya Babiloniatani. Nojuajaari puetunu mijiria jiyaniijianucujanaa tojtiquiaa nojuaja.

Babilonia tiaca catetanujiniji pohuatasano

18 ¹Naa Pueyaso seru niquitiniu nuhuaji janiyatej, janiyari socua tamonu Pueyaso seru niquirii jiyocuacaa-

nuji roseyanoni. Jiyanohua cumaacaracaari quiriquiaa. Na shacantuuca cumaacaari jiya cuhuatari- quiaa. ²Jiyocuacaanuji na rupaa paaretaree jiyanohuari. Seetanujuanaa miishocoriquiano na sequesano quiniuu- cua, nojuajaari juhua tariucua miishano na nacatariquiaa:

—iTari saniitiosaaree Babilonia tiaca! iJuhua niyarequetasaareeri cuno puereetuuca tiaca! Samaruhua quiquiora jatanishaaree quiarijia saniniuurija. Naaquiya quiquiora quiniutianiyaajari- huaj, puetunu pueya soosano pueresano jaacuatujuaca casaajanaa quiquioranio. ³Puetunu jiyacajinijiniojuanaa pueyari sapojonuusaquiaari Babilonia tiacajiniji- nio niishitiojosanota, juhuajaniya sacuaraatia mijjiaca nojori quiniuriaju- huaj, juhua mashaaseca. Naajuhuj, jiyaca jiyaniijianucuaari Babilonia tiacajinia sacuaraatia mijijosano mijiojuijaaajuhuj, cuno paanatu shiniujiniuuuca nojori. Babilonia tiacajinia quiniaa pueyari puetunu na panishano casamijianaa masejoquiaa puetunu jiyacajinijijianaa, saaja tama nojori cuaqueyajaaja nojori shuquiritiniu- ria. Naacuajitij, cumaneecara na casami niquitiojonuujuaca pueyari jiyanohua cumaneecaraca pueya.

⁴Na nuhuaji, janiyari tamonu rupaa tojirii jiyocuacaanuujini. Babilonia tiacajinia quiniaa Pueyaso pueya sequereeri:

—iCua muerasunaa, cuno tiacajiniji nia quiojore, niaa mariqui sesa mijjiacara quiriohuari, cuno sesa mijjiaca nia cojiniuucua! Nojorijiniji nia carajere, niaa mariqui puetunu nojoritiajanaa cojiritiasaare naquiya miiniuri. Nojoricuajaari quera saniitioshiya. ⁵Cuno tiacajinia sacuaraatia miishanoori puera jiyanohua caneyaree. Juhua tuhuananu- ri maashiyaree jiyocuacaanura.

Pueyasocuaajaari sacuaraatia nojori mijijosano niishiya. Majaari socua tari na naata rejeretanu. ⁶Babilonia cuaara namishaaria taa naquiya na mijioquiaa tamasacacuaani. iNojuaja cuaara saniitio-nu caminiujiushaaria saniniuuja, sesa na miiniuucua tamasa! Babiloniaari juhua pueya raatejoquiaari sacuaraatia na niishishano, sesa mijiaa nojori quiniuria juhua nojuajuhua. Cunora, nojuaja cuaara puetunu Pueyaso juaaquiacaanaa raatesaaria, tama na suhuocojiniajaaja mishinishanoni. ⁷Naatej, taa tama na cuaqueyajaaja na shuquiritiquiaa sacuaraatia na miishacaricuaani, saniniuuja cuaara naa jiyanhua miitiasaariajuhuaj. iJiyanhua tama na cuaqueyajaaja timitiaja na quiniuucuaaju-hua, cuaara saniitiosaaria! Nojuajaari tama sequequiaajaacujua: “Janiyari niya cajiya shuquiriaatiani, cumaacaraca maaji, pueya tojishano jiyaniija. Janiyari maja mashiquioni. Majaari quenaaja cua taraajenu quiniutianiya”. ⁸Cunora, niquiriyatu juucajiniaja, cuno Paanatuuri jiyanhua taraatia miitiasaanutaniya. Jiyacaritij, cusuunuunuri quiniutianiya, naquiya miiniu, miaajenujuhuaj. Jiyacari catijiatasaanutaniyajaariuhua. Jiyanhua cumaacaraca Jiyaniija Pueyaso quiniuucua, nojuajaari naa saniitionutaniya cuno Paanatu.

⁹Mijiria jiyaniijanucuaari sacuaraatia miiniuria cojiquiaa cuno Paanatucuaaja, tama nojori cuaqueyajaaja nojori shuqiritiniuria. Cunora, nojoriiri jiyanhua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya. ¹⁰Nojoriiri na puerenuta na shootianutaniya tucuaanuji, nojori mariqui saniitiosaarejaariuhua. Nojoriiri jiyacari naa sequenutaniya Babilonia tiaca:

—iJuhuej! iQuiaa taraatia miishiya tiaca maniniuniao! iQuiaari jiyanhua cumaacaraca quijia juucua Babiloniana! iQuiaari canashiyaquiji saniitiosaare!

¹¹Puetunu jiyacajinijanaa, cumaneeceara na casami niquitiojonaa pueyari Babilonia tiacaacua nujuquetunutaniya. Nojoriiri jiyanhua taraatia quiniutianiya nojori niishishacari, nojoritiucua tee na casami niquitiojore na cumaneecearani. ¹²Tucuaanuji Babilonia tiacajiniara nojori nitiasano casami quijiaari nio: oro, plata, jiyanhua panishano saijiuhuaj, noturu shipinijosano sainio. Nitiasa-quiaajaariuhua maniniuqui toqueya linojiniji*, sedajiniji* toqueya, shaaruke toqueyajuhaaj, juhua jiyaniija cushishano, naatuque toqueyano.

Nitiasa-quiaajaariuhua puetunu tamaatia shanhua jaanujua juhuana raquiquia, elefante quiaajiniji shipinijosano casamijiuhaaj, shanhua naanajiniji shipinijosano casaminio. Nitiasa-quiaajaariuhua broncejiniji* shipinijosano casami, cumueeca casaajiniji shipinijosano casamijiuhaaj, shanhua mármol saajiajiniji shipinijosano casaminio.

¹³Naajuhaaj, nio shanhua jaanujua casami: canela, miesu nunacuhua, catijasocoriquiano shanhua jaanujua casaa, mirrajuhaaj, cuaqueyacua shuquiujiutiasano shanhua jaanutajanio. Nitiasa-quiaajaariuhua jereeca uva caaca, shiyocua, maninia cashojuajuhaaj, trigo jajaunio. Nitiasa-quiaajaariuhua casami niyotesano seya, borregohua, caballohua, caballohua jayotasocoriquiano shipinijosano casaanio, cumaneeceara niquitiojosocoriquiano pueyajuhaaj seya nojori quiniuria. ¹⁴Jiyacaritij, Babilonia tiacaari naa sequesaanutaniya:

—iMajaari socua quia mioonu quiniutianiya jiyanhua quia maniniucuasano naana jajau, jiyanhua quioojia jiaatiasano nocuani! iPuetunu quia

timitiasano casaajanaari maja tari na quiniu quiniutianiya quiaara, shanohua niquishano casami, jiyanhua cumanee-cata quia masasano casaminio!

¹⁵Puetunu cuno casami niquitiojonaa pueyajanaari jiyanhua casamiriaca quiya Babilonia tiacajinia quiniaa masejonuucua nojori casami. Maja nojori saniitiosaanurajuhua, cuno pojoriiri tucuaaanuji na puerenuta nocua nujuquetunutaniya. Nojoriiri na sapuenu-ta naa na sohuarejotanutaniya:

¹⁶—iJuhuej! iBabiloniaari tiaca maniniu quijia juucua! Jiyanhua shanohua niquishano quijiaari, taa casamiriaca maajicuaani, na cushishacari na maniniushitiaja casaa. Naa shanohua niquishiyari juhua maaji linojiniji cohuaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinishano casaata na maniniushishacarijuhuaj, noturu shipinijosano saitiajuhuaj, shanohua niquishano saitianio. ¹⁷iJiyanhua queraatia puetunu na jiiatiasano casamijianaari canashiyaquiji catijiasaaree juhua sohuanatuu!

Puetunu pueyajanaa, canapuate shoniniacu caminiajinia poonijionaa na cumaneecaracujani, nojoriiri tucuaaanuji shootiariquiaa Babilonia tiaca catetasacari. Naa shootiatuquiaajaarihua casami jaquerojuaca tamaquicua tiaca tacatajajiniaqueya, rucoona pueya, buquejinia poonijionaa pueyajuhua, nojori camarucuanio. Puetunu cuno pojorijianaari tucuaaanuji shootiariquiaa Babilonia tiaca catetasacari. ¹⁸Nojori niquishacari najaca nujuaano jiya cajiniocuara, nojoriiri naa sariyocua-turee:

—¿Socua tamonu tiacateeri quia juhua cuno Babilonia tiacajuhua? iShaaqui!

¹⁹Jiyanhua nojori taraajenuta, nojoriiri jiyojua nanooree na nacaacua. Nojori

nujuquenuta, nojoriiri naa sariyocua-turee:

—iJuhuej! iBabiloniaari tiaca maniniu quijia juucua! iPuetunu shoniniacu caminiajinia buque jiiatianaajanaari jiyanhua casamiriaca quiya, jiyanhua casamiriaca Babilonia quiniuucua! iQuiarijia saniniuujia, canashiyaquiji puetunujuanaari shaajasaaree!

²⁰Jiyacaritij, Pueyaso seruuri naa nacaree:

—iNia shuquiriri, jiyocuaaanu quijiacanaa! iBabilonia saniitiosaanuucua nia timiquiore, Pueyaso saquiriojosano pueyanaa, Jiyaniijia Jesu jiyaramiquishano pueyajuhua, Pueyaso sequesano caminiujuniano! iPueyasocuaajaari niaacua namirii Babilonia!

²¹Jiyacaritij, cumueeca Pueyaso seruuri jiyanhua puereetuca saajia paree, juhua trigo jajau jacanojotaja saajia. Shoniniacu caminiajinia na jatasacari, naa sequeeri:

—iTaa cua jatasano saajia shaajemaa shoniniacu caminia queronijiniacuaani, quiaari naa shaajasaanutaniya canashiyaquijijiuhuaj, Babilonia tiacanaa! iMajaari socua quia niquishaanu quiniutianiya!

²²iQuia nuucuaari tojetaarucujanaa sanaaca quiniutianiya! iMajaari arpa taquiniojonu tojishaanu quiniutianiya socua, turequenaco jonenenuujuhua, trompeta jonenenuunio! iPuetunu tamaatia poonijosano niishijiaa juaashi-quiaraca pueyajanaari shaajasaanutaniyajuhua! iMajaari quenaaja niquiriyatu cureenu quiniutianiya quia quishaqui! iNaajuhua, majaari socua riiquiniuuniu tojishaanu quiniutianiya! ²³iMajaari quenaaja niquiriyatu samaritiu niquishaanu quiniutianiya noshiano quia quishaqui! iNaajuhua, majaari camishacari queranacunuunu cojuatunenu tojishaanu quiniutianiya socua! iQuiaari naa saniitiosaaareequij,

jiyanohua cumaacaraca quia casami
niquitiojonaa pueya quiniuucua puetunu
jiyacajinijanaa! iNaajuhua, quiaari
puetunu jiyacajinia quijiaca pueyajanaa
shimiojona, sapojosano nojori quiniuria
puetunu sacuaraatia casaa quia miiijosanotajanaa! ²⁴iQuiarijia saniniuujia,
quiocua tiuutiashiyari pueyara Pueyaso
sequesano caminiujuninaa puecoosaanu,
Pueyaso saquiriojosano pueya puecoosaa-
nujuhuaj, puetunu jiyacajinijanaa pueya
puecoosaanunio!

19 ¹Naa cua tojiniu nuhuajitij,
janiyari jiyocuacaanu tojirii
queraatia rupaacani. Naa sequeturiquiaa
jiyanohuari:

—iJiyanohua maninia pa Pueyaso!
iNojuaja pa shuquiritiare! iNojuacuajaari pa Jiyanoojia! iNojuajaari
jiyanohua shacantuuca, tojetaarucujajanaa maninia miiijia na
quiniuucua! iPuetunu cumaacacajajaariuhua! ²iManinia na
niishiniuucua puetunu cuno Paanatu miishano sacuaraatiajanaa,
nojuajaari maninia na saniitioree! iCuno Paanatuuri jiyacua quijiaca
pueya sesoquiaari tojetaarucujajanaa, sacuaraatia na miiijosano na
niishitiojosanota! iPueyasoori cunora na saniitioree! iNaajuhua,
Babilonia puecoonuucua Pueyaso tojitiajaca pueya, Pueyasoori na
namiriijuhuaj!

³Jiyocuacaanuji rupaaca cua tojishano-
ni, nojoriiri na sequerohuacuhua:

—iJiyanohua maninia pa Pueyaso!
iNojuaja pa timitiariquia pueyacaanu! iPueyaracaanu cuno
Paanatu saniitosacari, majaari na najaca turetanu quiniutianiya
quenaaja!

⁴Cuno veinticuatro niishijiaca
jiyanijianucua, cuno cuatro saminio
casaajuhua, nojoriiri jiyacari jiyocuara

jacamaturee Pueyasoocuara. Nojoriiri
naa timitiaree Pueyaso, cante na
shacantuuca cumaacajinia cajiriquiaacua-
jani. Nojoriiri naa na sequeturiquiaa:

—iCuaara na quiiriatej! iPa Jiyanii-
jia cuaara timitiasaaria
pueyaracaanu!

⁵Jiyacaritij, tamonu rupaari tojishaaree
Pueyaso cajishaquijijianaa. Naa sequeriquiaari:

—iPa Pueyaso nia timitiariquia,
puetunu na tojitiajaca pueyanaa!
iNojuaja nia shuquiritiare, tojisha-
no pueyanaa, niajanijajuhua,
tojishoo pueyanaa!

Borrego Niquiojua camishocoriquiano maaji maniniushishacari

⁶Jiyacaritij, janiyari queraatia pueya
tojirii jiyanohua nacaanoni, juhua
puereetuuca sararojua, juhua miacana
majacunujuhuaj. Puetunu nojorijianaari
naa sequeriquiaa:

—iJiyanohua maninia pa Jiyaniiijia
Pueyaso! iNojuaja pa timitiariquia
pueyaracaanu! iNojuacuajaari
Jiyaniiijajanaa! iPuetunu cumaacacajajanaajuhua! ⁷iPa shuquiriri!
iPa timiri! iQuiarijiacuajaari
Borrego Niquiojua caminiu juuca,
pueyaracaanu na saquiriojosano
pueya rupenura nojuaja! iCunora,
nojuaja pa timitiare jiyanohua!
Necoranoori tari maniniushirii na
caminiuria. ⁸Maniniuqui lino toque
cushitishaareeri, cohuajaque
shacantuque. Necoranoni, nojori-
cuajaari puetunu nocua tiuujia
pueyajanaa. Naajuhua, cuno
cohuajaque na toqueni, cunocua-
jaari puetunu maninia nojori
miiijosanojuanaa.

⁹Pueyaso seruuri jiyacari cua sequeree:

—Quia naajiotare nio: “Shuquiriaatia
quijiaca cutaraari noo pojori, canapute

Borrego Niquiojua camishacari querana-cujuajiniara masuusanoni”.

Naa cua sequeree socuaari:

—Cua sequesanonni, cunoori seetanu Pueyaso rupaajanaa.

¹⁰Jiyacaritij, janiyari Pueyaso seruucua-ra mojuquetareeni, juhua Pueyasooacara, nojuaja cua timitianura juucua. Cua sequequee saajaari:

—iMaja pueyanonaa! iMaja naa quia miiniu! Janiyari nareja Pueyaso seruni taa quiajanuyacuaani, juhua quia tapueyocucajuhua, noo pojori canapue-te pa Jiyaniijia Jesujiniji pohuatanu tarinitiaashijiacaani. iPueyasooacara quia mojuquetare cutara, quia timitianura nojuaja! Puetunu Jesujiniji pohuatasano-juanaani, cunoori Pueyaso Sohuanu niishitishano na pohuatanaa, janiya, niajanijajuhua.

Cohuajohuana caballo nijinia cajiniajiniji pohuatasano

¹¹Na nuhuaji, janiyari jiyocuaaanu Pueyaso quiquio niquiri tariucua riatasanoni. Janiyari tii niquiri cohuajohuana caballoni. Na nijinia cajiniaari caapiqui sesacaraca quiriquiaa. Nioori na sesaca: “Na sequesano miiija”, “Seetanu sequejajanaa”. Naari na sesaca. Tojetaa-rucuaajanaa maninia miiija na quiniucua, puetunu niishijajanaajuhua, nojuajaari seetanujanaa maninia saniitiojua sesa miijiaca. Naajuhua, majaari najuhua na miaquetojonu na paraata. ¹²Puetunu casaajanaa niquiija na quiniucua, na namijiiaari juhua mani rimianacuyano niquishaariquiaa. Jiyaniijianucuarano shipinijosano nacaqueya pasacoriquiaa na nacaacuaari. Cunoori seetanujanaa Jiyaniijajanaa na quiniucua. Tamonu na sesaari naajiotasano quiriquiaajuhua. Cuno sesaari tama na niishishanojuaaja cutara. ¹³Na toqueeri nanacatuque quiriquiaa. Nojuajaari tariucuaaanu nio

sesaraca quijiacuaja, “Pueyaso Rupaa”.

¹⁴Jiyocuaaanu nata quiniaa na soldado-huari na nuhuaji sacuariquiaa. Puetunu nojorijianaari cohuajohuanaca caballo-hua nijinia cajituriquiaa. Naajuhua, nojoriiri linojiniji cohuajaquijiasano toqueyaraca quiriquiaa, jiyano-hua cohuajaqueya tojetaarucuaajanaa. ¹⁵Nojori Jiyaniijajanaa rupaamaji, nijiniaquetu-cuja mueruuri puereeta mueranacuriquiaa. Cunoori puetunu mijiria jiyacajinijajanaa na tojitiaashijiaca na puetujutajara. Nojuajaari jiyacari nojori Jiyaniijajanaa quiniutianiya, nojori na jiitianura jiyano-hua na cumaacata. Puetunu cumaacaracajanaa Pueyaso juaaquiaca nojori saniitionuta-niyari, naatej, taa uva rapijioshiya na caaca shoonuracuaani. ¹⁶Na tucuaque toqueecua, na ruhuajacuucujuhua, naa naajiotasanoori quiriquiaa: “Jiyaniijianu-cua Jiyaniijajanaa”, “Camarucua Camarnujanaa”.

¹⁷Na nuhuaji, janiyari tamonu Pueyaso seru niquiri pananuucua nujuaanoni. Nojuajaari puetunu jiya cajiniocua jaacuatujua casaajanaa jiiquioonuuri-quiaa jiyano-hua, teyano jaacuatujucate shu miojonuujucacuaajani. Naa cuno jaacuatujua casa sequeriquiaari:

—iMiji, niya nia rerejosee! iPueyasoori nia queranacutenutaniya! ¹⁸iNojuajaari queraatia shu nia mianuutenutaniya! iCuno shuuri jiyaca jiyaniijianucua shu, soldado-hua camarucua shu, jiyano-hua cumueca puereyaquijiaca shu, caballo-hua shu, na nijinia cajituniiaa pueya shujiuhua! iCamarucuaaju pueya shuuri quiniutianijajuhua, poonijjotesano pueya shu, tojishoo pueya shujiuhua, tojishano pueya shunio!

¹⁹Jiyacaritij, janiyari cuno puereeta niquishano Casaa niquirini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaa-

ri tariucua rerejonu quiriquiaa na miaquetoojonura cohuajohuana caballo nijinia cajiyana, nata quiniaa na soldadohuatanio. ²⁰Cuno na naca pishano cushiriinohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacaraca quiriquiaacuaja mijiria quijiaca pueya na sapojonura na cumaacata na miishanota, nojori na tiutiniuria na naca pishano cushiriinohua Casaacua. Naa na sapojonuucua mijiria quijiaca pueyatej, nojoriiri nojori cuaqueya tarinitiaquiaari na naca pishano cushiriinohua Casaa sesa naajiotasaanura nojoriicua. Naajuhuj, nojoriiri juhua cuno puereeta niquishano shipinishano Casaacuara mojoquetacojua quiquiaari juhua Pueyasoocua. Jiyacaritij, cuno caapiqui puereeta niquishano Casaari azufreta noshiyano mani quiquiojinia quejoosaaree saminiucua. Nojoriiri tii pueyaracaanu naquiya miishaanutaniya. ²¹Puetunu nojoritia quiniaajanaari saniniuujia puecoosaaree nijiniaquetucujaja mueruuta, teyanote cohuajohuana caballo nijinia cajiyano rupaamaji mueranacuriquiaacuajani. Puetunu jiya cajiniocua jaacuatujucua casaajanaari nojori shu tooquioree jiyanhua.

**Mil marijiaa Satanás
morosaanujiniji pohuatasano**

20 ¹Na nuhuaji, janiyari tamonu Pueyaso seru niquirii jiyocuacaa-nuji roseyanoni. Puequeetuaju raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. ²Pueyaso seruuri cuno naatuhua Naaqueru juhua cohuaniquia niquishano quiasee. Na morojoreeri mil marijiara. Nojuacuajaari cuno tariucuaaanu Soconu, samaruhua jiyaniijajanaatuhuj. Na sesaari

“Satanás”. ³Maninia na morojonu nuhuaji, Pueyaso seruuri puequeetuaju raama na jartaree. Raa tiootiu mishiquio-rohuari. Tiootiu rupanacureeri, maja na riatasaanura. Sesaacaari naa mishiquio-saareequij mijiria quijiaca pueya na sapojiyaquiniuucujaji cuaara na shocojorejaatijia mil marijia. Cuno mil marijia jaara na shocojore, rupaquijiara cartesaa-nutaniuhuari na saniitiosaanuhuarajanaa cutara.

⁴Janiyari jiyacari queraatia pueya niquirii jiyaniijia cajitiucujania cajitiuyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jiitianura. Janiyari noo pojori sohuanuhua niquiriijaaniuhuj, canapute nacareesaquiaaricujani nojori poojotanuucua pa Jiyaniijia Jesujiniji, Pueyaso rupaa tojitiajaca nojori quiniuucujahuaj. Nojori cutaraari cuno na naca pishano cushiriinohua Casaacuara jacamatiaquiquiaari tojetaarucujajanaa, juhua nojuaja niquishano shipinishano Casaacarajuhuj. Naajuhuj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niquiara samiitiacoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijia. ⁵Saniniuujia, narta macunucuaari maja na samiitiani-jiosaanu quiriquiaa cuno mil marijia cuaara shocojorejaatijia. Nio macunucua samiitianijiosacari cua niquishanoni, cunoori coteenujanaa Pueyaso samiitianijiosacari pueya. ⁶Shuquiriaatia quijiaca cutaraari noo pojori, canapue Pueyaso samiitianijionutaniya coteenujanaacujani. Nojoriiri jiyacari tojetaarucujajanaa maninia quijiacara jatanishaanutaniya pueyaracaanu rishijiaca nojori quiniuria. Naacuajitij, Pueyaso ruuretajaca pueya

jaara puetunu shaajasaarejanaa, jiyacari majaari Pueyaso pueya pacutenu quiniutianihua cusonu. Saniniuujia, nojoriiri pueyaracaanu shamaatia timitianutaniya Pueyaso, Cristonio. Naajuhujaj, nojoriiri jiyaniijianucua quiniutianiya Cristota, mijiria quijiaca nojori jiitiasacari cuno mil marijiaara.

Sesaaca saniitiosacarijianaa cutara

⁷Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. ⁸Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog* pueya, Magog pueyano. Nojori na sapojonuta, nojuajaari puetunu jiyaca jiyaniijianucuaajanaa rerejotenutaniya, puetunu nojori soldadohuatajanaa, nojori miaquetojonura pa Jiyaniijiaata, puetunu na pueyatajanaa. Nojori soldadohuari jiyanoehua queraatia pueya quiniutianiya, juhua shoniniacu caminia quihuico paajia jaaquia. Majaari na naata serojosaanu.

⁹Cua niquishacari, tojetaarucuaajanaa jiyanoehua queraatia pueyari nijioriquiaa. Jiya pueturiquiaa puetunujanaaari, juhua tereya nojori quiniucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocuacaanuji tinishaa-re nojoriicua. Puetunu cuno pueyajanaari catijiasaaree tojetaarucuaajanaa. ¹⁰Satanás, cante puetunu cuno pueyajanaa sapojoree-cuajani, nojuajaari caminiajina jataaaree tee cuniqui mani noshiya azufretacuajani. Tariucuaaanu tii jaqueroosaaquiaricua-jaari na naca pishano cushiriinohua Casaa, narta puereeta niquishano Casaanio. Cunocuaajari mijiria quijiaca pueya sapojoquiaaricuaaja, na naca cushiriinohua Casaacura jacamatujuaca nojori quiniuria. Nojoriiri tii miitiasaanutaniya tojetaarucuaajanaa pueyaracaanura, juuca, niucuanio.

Macunucua nequesoreesacari cohuaja cajitiiu tacoji

¹¹Na nuhuaji, janiyari Jiyaniijiajanaa cohuaja puereetuca cajitiiu niquirini, tii cajinianio. Na niquiara, jiyari puetunu shaajequeejanaa, jiya cajiniocuanio. Majaari socua na niquishaanu quiriuhua. ¹²Jiyacari-tij, janiyari puetunu macunucuaajanaa niquirii nujuatiuyano cuno cohuaja cajitiiu tacojini; jiyaniijianucua, tojishoo quijiaca pueyano. Jiyacaritij, na cohuaja cajitiiujinia cajiniaari na nequesoreetuneece riataquereee, socua tamonu nequesoreetuneece. Cuno nequesoreetuneecejinia naajiotasano quiyacuajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuaaanu macunucuaajanaari nequesoreesaaree puetunu nojori miishanojinijijianaa, taa cuno nequesoreetuneecejinia na naajiotasaa-quiaaricuaajani. ¹³Cua niquiara, macunucua quiquiojinia racatasano puetunu cusonuuno sohanuhuaajanaari na cuaqueya rupetesaa-rohua, shoniniacu caminiajina moquecono, jiyacua moquecononio. Puetunu nojorijianaari nequesoreesaaree taa mijiaa nojori quiquiaaricuaajani. ¹⁴Na nuhuaji, Cusojuana, macunucua Quiquiojuhuaj, nojoriiri mani noshiyano caminiajina jaqueroosaaree. Canapueete cuno mani noshiyano caminiajina quejoosocoriquiano pueyacuaajani, nojoriiri cusonuuno pacuteriquianocuaaja. ¹⁵Naacuajitij, canapueete Pueyaso samiitiani-jiosocoriquianohua nequesoreetuneecejinia naajiotasoo quiriqiaani, nojoriiri mani noshiyano caminiajina quejoosaaree pueyaracaanura.

Quiarinio jiya cajiniocuaajiniji pohuatasano, quiarinio jiyajinijinio

21 ¹Na nuhuaji, janiyari quiarinio jiya cajiniocua niquiriini, quiarinio jiyanio. Coteenujanaa jiya cajiniocuaari tari shaajasano quiriqiaa,

jiyanio. Naajuhuj, majaari shoniniacu caminia quiniu quiriquiaa tari. ²Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaa-rucuaajanaa shanohua maniniushitishano quiriquiaari, juhua neyacarano camisho-coriquiano niyacoo. ³Naajuhuj, janiyari Jiyaniijajanaa cajitiujiniji tojirii jiyanhua nacanuni. Naa sequeriquiaari:

—iPueyaso Quiquioori pueya tajinia quiya tari! iNojuajanaari nojoritia quiniutianiya! iNojoriiri na pueya quiniutianiyajuhuj! iNojuajaari nojori cojiniutianiya, nojori Jiyaniijajanaa na quiniuria, maninia na jiitanura nojori! ⁴iNojuajaari puetunu nojori namijiaacajanaa tuujunutaniya! iJiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! iPuetunu cuno taraatia miiniucua-jari tari shaajasano quiriquiaa!

⁵Na nuhuaji, Jiyaniijajanaa cajitiujinia cajiniaari naa sequeeree:

—iCua tojiri! iJaniyari quiariniora mijia puetunu casaajanaani!

Cua sequeereejaariuhuj:

—Cua sequesano quia naajiotare.

Seetanujanaari cua sequesano.

Janiyacuaajaari cua sequesano tohuatee-quiaa pueyaracaanuni.

⁶Cua sequerohuariuhuj:

—Cua sequesano cua miishocoriquiano-ni, janiyari tari na tucuateree miiniuni.

Janiyari quijiajuhanani. Janiyari pueyaracaanu quiriquianojuhuaj.

Janiyari puetunu casaajanaa coretanijiani, na shaajajuhuj. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhua. Cuno samiitianijia mohuacani, cunoori cua Sohuanucua. Janiyari nareja na niquitioquiaani.

Majaari na sami cua masenu quiquiaa na

ratuna. ⁷Cante puetunu casaajanaa rejeretaja quijiani, cua tojjia na quiniucua, nojuajaari puetunu cua jiitiasanojuanaa jiitiana quiniutianiya. Nera, janiyari na Pueyaso quiniutianiya-ni. Nojuajaari quiyanu quiniutianiyacujua. ⁸Sesa pueya saniniuujia, nojoriiri puetunu quejoosaariquianojuanaa azufreta noshiyano mani caminiajinia. Naa quejoosaanutaniyari nio pojori: Pueyaso tojtiaashijiaca pueya, puerejaca nojori quiniucua, Pueyaso Rupaacua tiuyashijiaca, soosano pueya tama sesa nojori miiniucuaaja seseno, pueya moojuaca, na camishoo maajipohua numuetucunujuaca, shimiacuri, shipinijosano casaacuaa jacamatujuaca juhua Pueyasoocua, puetunu cuaracashijionujuaca pueyajanaano. Puetunu cuno pojorijianaa jaara nequesoreesaare, nojoriiri puetunu taanuusaanutaniyanaa Pueyaso shuriucua. Nojoriiri mani noshiyano caminiajinia quejoosaanutaniya, pueyaracaanu naquiya nojori miishaanura tii. Cuncuajaari sequeshiya, “pueya pacutesacariuhua cusonu”.

Quiarinio Jerusalén tiacajiniji pohuatasano

⁹Janiyacuaajaari tari nia pohuataree cuno siete Pueyaso seyajinijini, canapuede siete miacujua patootanaa quiquiaaricua-jani, mishaja Pueyaso saniitiotajata. Niquiriyatu nojorijinijinioori cucua nimiaa. Nojuajaari cua sequeese:

—Miji. Quia niquitiriiria Borrego Niquiojua niquiorano. Nojuacuaajaari pa Jiyaniijia pueya, na quiquiojaariuhuj.

¹⁰Jiyacaritij, nojuajaari cua sohanu jiyataaree jiyanhua puereetuca jiyaconaja tuhananuucua. Tiji cua niquitirii cuno puereetuca quiarinio Jerusalén tiacaari, Pueyaso shuriucua roseyano. Tojetaarucuaajanaa shanohua maniniushitishano quiriquiaari. ¹¹Nene-

cuariquiaari Pueyaso shacantuuca cumaacata. Na nenecuanuuri juhua jiyanoehua panishano saajia nenecuanu quiriquiaa, juhua jaspe saajia. Maatia niquishiyari na tamajiria, juhua cohuaja motiquio. ¹²Cuno tiaca shocua matakaari jiyanoehua puereetuuca quiriquiaa, jiyaconajajuhua. Tiaca shocua matakaari doce tiotiuhuaraca quiriquiaa. Niquiryatu Pueyaso seruuri puetunu cuno tiotiuujinijianaa nujuaturiquiaa. Naajuhua, supuetana Israel doce niquiohuacuajinio supueno doce pueyapue sesacaari puetunu cuno tiotiuhuacuajanaa naajiotasano quiriquiaa. ¹³Jiuujianaraca tiotiuhuari pananu muetasamajiria quiriquiaa, cuno tiaca matakaacua. Socua jiuujianaraca tiotiuhuari quiriquiaa pananu muetasa-maji miaquetajara. Naajuhua, socua jiuujianaraca tiotiuhuari pananu muetasamaji muenecara quiriquiaa. Socua jiuujianaraca tiotiuhuari quiriquiaa pananu tiuquishocora. ¹⁴Cuno tiaca matakaari doce puereetujuaaca saicua nujuaturiquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

¹⁵Cuno Pueyaso seru cuata pocojori-quiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotiuhua, tiaca shocua matacanio. ¹⁶Cuno tiacaari jiyanoehua tucuhuana quiriquiaa. Na cajiniocuaari mariyata juhua na tucuhuana quiriquiaa-juhua. Maninia tiasano quiriquiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil* dosciento kilómetro* quiriquiaari na tucuhuana, na jiyaconaja, na cajiniocuanio. ¹⁷Na nuhuaji, tiaca mataka shanacujureejaariuhua. Setenta y cinco metro jiitariquiaari. Pueyaso seru shanacujutaja tucuaneeeri mariyata juhua

mijiria pueyano shanacujutaja quiriquiaa.

¹⁸Cuno tiaca matakaari puetunu jaspe saijinijianaa shipinishano quiriquiaa. Tiacaari saniniuujia saaja orojiniji shipinishano quiriquiaa, maja quenaaja tamonu casaata cojitishano. Naacuajitij, cuno oroori juhua cohuaja motiquio quiriquiaa. Maatia niquishiyari na tamajiria. ¹⁹Cuno mataka nujuataja doce sairi queraatia tamaatiujiaaca shanohua niquishano saitia maniniushitishano quiriquiaa. Cuno mataka nujuataja doce saijinijinioni, coteenu saajiaari jaspe saitia maniniushitishano quiriquiaa. Jaspe sairi neeruua cojitishano pocojua-naqueta. Segundo saajiaari zafiro saitia maniniushitishano quiriquiaa. Zafiro sairi nentujuaaca naata. Tercero saajiaari ágata saitia maniniushitishano quiriquiaa. Ágata sairi tejatujuaaca neeruua. Cuarto saajiaari neeruua esmeralda saitia maniniushitishano quiriquiaa. ²⁰Quinto saajiaari ónice saitia maniniushitishano quiriquiaa. Ónice sairi pocojuanaque naatuua cojitishano. Sexto saajiaari naatuua cornalina saitia maniniushitishano quiriquiaa. Séptimo saajiaari crisólito saitia maniniushitishano quiriquiaa. Crisólito sairi tijiaaca. Octavo saajiaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajiaari topacio saitia maniniushitishano quiriquiaa. Topacio sairi jiyanoehua pocojuanaque. Décimo saajiaari crisoprasa saitia maniniushitishano quiriquiaa. Crisoprasa sairi jiyanoehua neerujuaaca. Undécimo saajiaari jacinto saitia maniniushitishano quiriquiaa. Jacinto sairi jariya naata naatuua. Duodécimo saajiaari jiyanoehua nentuaa amatista saitia maniniushitishano quiriquiaa. Puetunu cuno saijianaari jiyanoehua shanohua sai, shacantujuaaca. ²¹Tiaca shocua mataka doce tiotiuhuari noturu shipinijosano saijiniji shipinijo-

sano quiriquiaa. Niquiriyatu tiotiuuri niquiriyatu noturu saajiajiniji shipinishano quiriquiaa. Naa shipinijiosano quiriquiaari puetunu cuno doce tiotiuhuajanaa. Tiaca nuucuacaari tojetaarucujanaa orojiniji shipinishano quiriquiaa. Jiyanoehua maninia cuno oro quiniuucua, Pueyaso shacantuucaari na tohuariquiriquiaa, juhua motiiquio cohuajaco na quiniuucua.

²²Cuno tiacajinia, majaari cua niquiniu quirii Pueyaso Quishaqui, tii pa rupenu-
ra nojuaja. Cuniqui, majaari socua Pueyaso Secojoua tia panishaanu. Puetunu cumaacaracajanaa Pueyasoja-
naari tii quiyacujaja, Borrego Niquiojuajuhua. Puetunu cuno tiacajanaari nojori quishaquicujaja, pueyaracaanu nojori rupesano pa quiniuria. ²³Cuno tiacaari maja na paniniu pananu na cuhuatariquiano, racajuhua. Pueyaso shacantuuca cumaacacujajaari na cuhuataa. Borrego Niquiojuacujajaari na cuhuatana. ²⁴Puetu-
nu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu jiyaca jiyaniijianucujajanaari socua nojori panishano casami patoota-
nutaniya nojori cuhuatana tiacajiniara, Jiyaniijiajanaa nojori niquitiosocoriquia-
no. ²⁵Cuno tiaca tiotiuhuari pueyaracaanu riataquesano quiniutiani-
ya, juuca na quiniuucua pueyaracaanu. Cuniqui, majaari quenaaja niucua niishishaanu quiniutianiya. ²⁶Jiyajinia quijiaca pueyari socua na panishano casami patootanutaniya cuno tiacajiniara. Cuno tiacaari jiyanoehua nojori timitiasa-
no quiniutianiya. ²⁷Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhua, majaari sesa mijiaca tiuquinu quiniutia-
niya tii, sapojonuujacanio. Saaja noo pojori cutaraari tii tiuquitianutaniya canapue sesacate pueyaracaanu

rishijiacarano Borrego Niquiojua naajioneejinia naajiotasano quiyacujani.

22 ¹Na nuhuaji, Pueyaso seruuri cua niquitirii pueya samiitianijiotaja moo, cohuajanacu tojetaarucujanaa. Nenecuariquiaari. Cuno mohuacaari Jiyaniijia Pueyaso cajitiujiniji pacartari-
quiaa, tee Borrego Niquiojua cajiyajaniuhua. ²Samiitianijia naanaari tiaca nuu jiuujiaaco nujuaturiquiaa, cuno moo shuriuquicojuhuaj, niijijiria, na taquijiriano. Cuno naanaari puetunu racarajanaa muetujuaca. Naacuajitij, puetunu marijarajanaa, doce caminiujiya muetunuuri. Na muecacaari maninia, puetunu jiyacajinia quijiaca pueyajanaa naarajotajara. ³Cuniqui, majaari socua Pueyaso sesacasano casaa quiniu quiniutianiya. Naacuajitij, Pueyasoja-
naa, Borrego Niquiojuajuhua, nojoricujajaari cuno tiacajinia quijiaca quiniutianiya, Jiyaniijiajanaa cajitii quiniuucua tii. Nojori tojitiajacaari nojori timitianutaniya pueyaracaanu tii. ⁴Nojoriiri Pueyaso jiquioco shootiajaca quiniutianiya. Na sesaari nojori jinihi naajiotasano quiniutianiya. ⁵Cuniqui, majaari niucua niishishaanu quiniutiani-
ya. Tii quijiaca pueyari maja na paniniu quiniutianiya samaritii, pananunio. Jiyaniijia Pueyasojuanaacujajaari nojori cuhuatanutaniya. Nojoriiri jiyaniijianu-
cua quiniutianiyajuhua, puetunu Pueyaso shipinishanojuanaa nojori jiitianura pueyaracaanura.

Jesucristo quera tiuquihua

⁶Na nuhuaji, Pueyaso seruuri cua sequeree:

—Cua niquitishano quiajaniani, cua sequesanojuhuaj, puetunu cunojuanaari seetanujanaa. Puetunujuanaari tohuateeriquiano. Pueyasoori na Sohuanuta niishitiquiaa na sequesano caminiujiunaa pueya, nojori pohuanu-

ra pueya niquiara na niishitiniu panishano. Naajuhuj, nojuacuajaari quiarijia na seru jiyaroree, na tojtiajaca na niishitiniuria taa quari naataja nojuaja tucuatanutaniya puetunu na sequesanojuanaani. ⁷Pa Jiyaniijacuajaari naa sequeya: “Janiya quera tiuquihua niaacuaní”. Shuquiriaatia quijiaa cutaraari noo pojori, canapute nio naajioneejinia Pueyasojiniji niishitishano tojijiacani.

⁸Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niquiniu nuhuajitij, cua tojinu nuhuajijihuaj, janiyari Pueyaso seru pajama mojoquetareeni. Janiyari naa mojoquetaree nojuaja cua timitianura juucuaní, juhua Pueyaso. ⁹Nojuajaari cua sequequee saaja:

—iMaja naa miiniu pueyanonaa! Janiyari Pueyaso serujuhuj, juhua quiajanijuhuj, juhua puetunu quiarta Pueyaso sequesano caminiujuninaa pueyajuhuj. Naajuhuj, nio naajioneejinia naajiotasano tojijiaa pueyani, nojoriiri cuarta Pueyaso seyajuhuj. iPueyasojuanaa quia timitiare cutara!

¹⁰Cua sequeereejaariuhuj:

—Pueyaso niishitishano nio naajioneejinia quia naajiotasanoni, cunoori maja saa quiaraja. Puetunu pueyajanaa cuara na niishiirianoj. Puetunu niya naajiotasano cuajaari quera tohuataya.

¹¹Naacuajitij, canapute sesa na miiniu tarinitianu paniaquiyani, sacuaraatia mijiojuacajuhuj, cuara na tarinitiaa-quiriaqui. Saniniujia, canapute maninia mijiojuaca cutarani, saaja Pueyasora poonijionuujuacajuhuj, nojori cuara tarinitiaaquiiria maninia nojori miinijuhuj.

¹²Pa Jiyaniijacuajaari naa pa sequeya:

—iTaaquiririnij! iQuera tiuquihuanijia! Janiyari cua tojtiajaca cua niquitijosocoriquiano casaa tiuquitianu-

taniuhuaní. Janiyari puetunu nojorijianaa nareja niquitiojonutaniyani, maninia nojori miiniucua quiria, nojori miishano jaara maninia quiri. ¹³Pueyaso Rupaa cua quiniucua, janiyari puetunu Pueyaso sequenu panishanojuanaa caminiujuniani. Janiyari quijiajuhanani. Majaari cua supueni quiquiaari. Janiyari puetunu casaajanaa coretanijiani, na shaajariquia-nojuhuaj.

¹⁴Shuquiriaatia quijiaa cutaraari noo pojori, canapute juhuacarijia nojori jiuujia jeequecanu Borrego Niquiojua nanacatani. Nojoriiri juhua cohuaque toqueyaraca quiniutianiya cua niquiara. Naacuajitij, nojoriiri tiuquitianishaanuta-niya Pueyaso quijia tiacajinia, nojori mioonura pueyaracaanu pueya rishitijia naanajiniji. ¹⁵Saniniujia, nio pojoriiri Pueyaso tiaca mataca tamajiria jateenutaniya: sacuaraatia casaa mijiaa, shimiacuri, na camishoo maajipohua numuetucunujuaca, narta pueya puecojuaca, shipinijosano casaacuara jacamatujuaca juhua Pueyasocucara, cuaracashijionu porocua pueyanio.

¹⁶Janiyacujaari cua seru jiyarorucuaa quiocuaní, na niishitiniuria quiajanija puetunu niya quia naajiotasanojuanaa, saniniujia Pueyaso pueya maapue niquiara na caminiujishaanura. Janiyacuajaari Jesuní, supuetana David niquiohuacuajinio caneno pueyajinijinio supueno, Jiyaniijajanaa cua quiniuria David niti. Naajuhuj, Pueyaso Nyanu cua quiniucua, janiyari noo rijiani, jojeatej, taa janiyajiniji naajiotasano quia tariucuacaanu Pueyaso Rupaajinia-cujani.

¹⁷Pueyaso Sohuanuuri Borrego Niquiojua niquioranota naa sequetiuya: “iMiji Jiyaniijianaa!” Canapute naa nio naajioneejinia naajiotasano tojiyani, nojori cuara naa sequeerajuhuj: “iMiji!” Cante jiyamueyani, nojori cuara

niiria, Pueyaso samiitianijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

¹⁸Cante nio naajioneerjinia juhuacarijia Pueyaso niishitishano tojiriini, taa Pueyaso miiniutianiyani, janiyajanaari nia numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneerjinia na pohuatasano naquiya na miitijaja casaata. ¹⁹Naajuhuj, cante nio naajioneerjinia pohuatasano cuaracashitijiani, Pueyasoori cuno pueyano

taanuunutaniya, maja na quijia tiacajinia na tiuquiniuria. Naacujitij, majaari nojori mioonu quiniutianiya cuno tiacajinia naana jajau, pueyaracaa-nu rishijiaca nojori quiniuria, taa nio naajioneerjinia na pohuatashiyacuajani.

²⁰Cante nio sequeyacuajani, nojuajaari naa sequeya: “Taaquiriirinij, quera tiuquihuanijia”.

Jaa, Jiyaniijia Jesunaa. iNaacuaaquiniatejaj! iRitia quia nimiohua canaacua!

²¹Pa Jiyaniijia Jesu cuaara puetunu niajaniyajanaa cumaquiiria na Sohuanuta.